

四庫全書

史部

欽定四庫全書

西漢會要卷六十五

宋 徐天麟 撰

方域二

論形勢

沛公初入關或說曰秦富十倍天下地形疆今聞章邯
降項羽號曰雍王王關中即來恐沛公不得有此可急
使守函谷關毋內諸侯軍

高紀

高帝六年田肯賀上曰甚善陛下得韓信又治秦中秦形勝之國也帶河阻山遙隔千里持戟百萬秦得百二馬地執便利其以下兵於諸侯譬猶居高屋之上建瓴水也夫齊東有琅邪即墨之饒南有泰山之固西有濁河之限北有勃海之利地方二千里持戟百萬遙隔千里之外齊得十二焉此東西秦也

高紀

韓生說項羽曰關中阻山帶河四塞之地肥饒可都以

伯項羽
傳

井陘之道車不得方軌騎不得成列

韓信傳

主父偃言齊臨菑十萬戶市租千金人衆殷富鉅於長

安

高五王傳

陳留天下之衝四通五達之郊也

酈食其傳

梁為大國天下膏腴地北界泰山西至高陽曰十餘城

多大縣

文三王傳

濟北之地東接強齊南牽吳越北脅燕趙此四分五裂

之國

鄒陽傳

淮陽天下郊勁兵處

灌夫傳

齊東都鉅海南有琅邪觀乎成山射乎之罘浮勃澥游
孟諸邪與蕭真為鄰右以湯谷為界秋田乎青丘彷徨

乎海內吞若雲夢者八九其於曾中曾不帶芥

司馬相如傳

越非有城郭邑里也處谿谷之間篁竹之中習於水鬪
便於用舟地深昧而多水險中國之人不知其執阻而

入其地雖百不當

嚴助傳

會稽東接於海南近諸越北枕大江

上

南山天下之阻也南有江淮北有河渭其地從汧隴以東商雒以西厥壤肥饒漢興去三河之止霸產以西都涇渭之南此所謂天下陸海之地秦之所以虜西戎兼

山東者也

東方朔傳

宮

正史無者不載後倣此

長樂宮

高祖五年治長樂宮三輔黃圖長樂宮本秦之興樂宮也三輔舊事宮殿疏皆曰興樂宮秦始

皇造漢修飾周回二十里前殿東西二十九丈兩棟中二十五丈深十二丈時帝遷都長安未有宮室先修秦

舊宮以

居之也

未央宮

高祖七年蕭何治未央宮立東闕北闕前殿武庫大倉云云

雒陽南宮

高祖置酒雒陽南宮

沛宮

高祖十二年過沛置酒沛宮

北宮

在未央宮之北見霍光及張后傳

建章宮

太初元年二月起

甘泉宮

吾丘壽王傳薦寶鼎於甘泉宮

林光宮

孟康曰甘泉一名林光秦離宮名見郊祀志

離宮

叔孫通傳惠帝常出游離宮

明光宮

太初四年秋起明光宮在城西

長楊宮

成帝元延二年幸長楊宮師古曰在盤屋

五柞宮

武帝行幸盤屋五柞宮燕王傳作五柞

萑陽宮

宣帝甘露二年行幸萑陽宮本紀注云左獻秦文王所起萑音倍按東方朔傳作倍陽宮

池陽宮

甘露三年上自甘泉宿池陽宮

章臺宮

江都易王傳

宣曲宮

司馬相如子虛賦注云
宣曲宮名在昆明池西

棠梨宮

同上

宜春宮

相如奏宜
春宮賦

鼎胡宮

揚雄傳黃圖
以為在藍田

蘭池宮

楊僕傳注
云在渭城

儲元宮

馮昭傳儀黃圖
云在上林苑

雲陽宮

同上

昭臺宮

霍后
傳

長壽宮

元后
傳

長門宮

東方朔傳又
傳皇后傳

鈞弋宮

趙婕
妤傳

長信宮

東方朔傳會
朝長信宮

永信宮

哀帝祖母定陶恭
皇太后稱永信宮

中安宮

哀帝母恭皇
后稱中安宮

東宮

劉向傳依東宮之尊師
古曰東宮太后所居也

中宮

哀紀食邑中宮師古
曰中宮皇后之宮

長定宮

淳于長傳
又許后傳

桂宮

成帝紀太子
居桂宮

三雍宮

河間獻王獻雅
樂對三雍宮

棧陽宮

郟祀志幸
雍棧陽宮

竹宮

禮樂志自竹
宮而望拜

步壽宮

宣帝起步壽
宮見郟祀志

平陽宮

成帝時雍大雨壞平
陽宮垣見郟祀志

德陽宮

景帝廟號德
陽諱不言廟

交門宮

太始四年上
幸交門宮

萬載宮

燕刺
王傳

黃山宮

東方朔傳西至
黃山注云宮名

首山宮

元封六年
作首山宮

思子宮

戾太子
子傳

犬臺宮

江充召見
犬臺宮

回中宮

匈奴傳回中地名
在安定其中有宮

蒲陶宮

匈奴傳單于來朝舍
之上林苑蒲陶宮

龍淵宮

武帝元光三年河水決濮陽汜郡十六發卒十萬救決河起龍淵宮服虔曰宮在長安西作銅

飛龍故以冠名孟康曰在西平渭水可用淬刀劍師古曰孟說是

宣防宮

溝洫志塞狐子築宮其上曰宣防

壽宮

郊祀志武帝置壽宮比宮以禮神君

萬歲宮

宣紀神爵元年幸萬歲宮

殿

承明殿

在未央宮中成帝鴻嘉二年有雉飛集於承明殿

長樂臨華殿

永始四年灾

紫殿

成帝永始四年幸甘泉郊泰時降集紫殿

甘泉前殿

郊祀志

鳳凰殿

宣帝作鳳凰殿以表嘉瑞見郊祀志

武臺殿

李陵名見未央宮武臺殿

白虎殿

杜欽對策白虎殿

顯陽殿

廣陵王傳

椒房殿

上官桀傳在未央宮皇后所居

溫室殿

京房傳公卿朝臣會議溫室注殿名

高門殿

上

麒麟殿

上

玉堂殿

上

金華殿

同上又見翼奉傳

曲臺殿

翼奉傳

溫明殿

上

馭娑殿

揚雄傳殿名也

丙殿

元后傳

飛羽殿

元后傳

便殿

武帝高便殿災

宴闕殿

鴻寧殿

傅太后所居也見五行志

殿前

霍光傳師古曰古者宮室高大通呼為殿非止天子宮中

室

宣室

賈誼傳受釐坐宣室王嘉何武召見宣室東方朔曰宣室者先帝之正處也非法度之政不得入

溫室

京房傳

凌室

惠帝四年未央宮凌室災凌室藏冰之所

織室

惠帝四年織室災注織室織造繪帛處

作室

成紀太子入作室門

非常室

五行志成帝時男子王褒衣絳衣入非常室中

長樂鍾室

韓信傳

暴室

畫室

霍光傳止畫室不入

請室

爰盎傳

飾室

元后傳

玉堂

揚雄傳上玉堂又郊祀志建章宮南有玉堂

瑤堂

禮樂志眺瑤堂

承明之廬

嚴助傳注在右渠閣

殿廬

金日碑傳少疾卧廬師古曰殿中所止曰廬

館

長安飛廉館

孝武紀元封二年

上林礪氏館

郊祀志

長楊射熊館

元帝永光五年幸長楊射熊館布車騎大獵又見揚雄傳師古曰在盩厔縣其中有

長楊射熊館

長安飛廉桂館

郊祀志

甘泉益壽延壽館

上

上林平樂館

武帝紀

雲林館

霍后傳

陽祿杯館

班婕妤賦二館名也

爾館元后傳

東館同上

上林涿沐館同上

長平館元后傳師古曰在長平坂

甲館畫堂元后傳

白鶴館孝武園白鶴館見翼奉傳

鴻臚客館張湯傳

闕

東闕北闕蕭何治未央宮立東闕北闕

鳳闕高二十餘丈見郊祀志

建章闕庚太子傳

長樂宮東闕宣紀五年鸞鳳集於長樂宮東闕

臺觀

欽定四庫全書

西漢會要
卷六十五

七

叢臺

高后元年趙王宮叢臺灾本紀云本六國時趙王故臺連聚非一故名叢臺

露臺

文帝卻作露臺本贊

柏梁臺

元鼎二年春起柏梁臺以香柏為之見本紀下同

甘泉通天臺

元封二年作

屬玉觀

宣紀甘露三年注云屬玉水鳥似鵝鵠

漸臺

同上又揚雄傳注云漸臺在泰液池中

神明臺

同上

昆明東觀

太皇太后避時昆明東觀

武臺

李陵名見武臺

石闕

封巒 鳩鵲

露寒

司馬相如子虛賦四觀在甘泉中

龍臺

司馬相如子虛賦注云龍臺觀名

細柳

同上

顥天臺

上

歸來望思臺

上

曲臺

翼奉傳

平樂觀

西域傳

河南成臯靈臺

高祖薄姬傳

上蘭觀

元后傳師古曰在上林中又見揚雄傳晉灼注同

甲觀畫堂

成帝紀生於甲觀畫堂

陽雲臺

子虛賦

蘭臺

掌圖籍之所

郎臺

東方朔傳陛下累郎臺恐其不高也師古曰郎堂下周屋

樓閣

宣室閣

甘露三年未央宮宣室閣火宣紀

石渠閣

在未央宮北以藏秘書見施讎傳

天祿閣

揚雄傳

麒麟閣

蘇武傳圖功臣於麒麟閣

井幹樓

郊祀志立井幹樓高五十丈師古曰井幹樓積木而高為樓若井幹之形也井幹者井上木欄

也其形或四角或八角張衡西京賦云幹接疊而百層即謂此樓也

龍樓門

元帝嘗急召太子出龍樓門不敢絕馳道注雲門樓上有銅龍若白鶴蜚廉之為名也

花園

上林苑

武帝作上林苑見東方朔傳

中牟苑

宣帝元鳳三年罷中牟苑賦貧民本紀注云在滎陽

樂游苑

宣帝神爵二年起樂游苑本紀云在枉陵西北曲池之北

水衡禁園

元帝初元二年興貧民

博望苑

武帝為太子作博望苑令受賓客成帝建始二年罷

黃山苑

霍雲張園獵黃山苑中霍光傳

梁東苑

梁孝王築東苑三百里本傳

宜春下苑

元紀

邊羣六牧師苑

百官表師古曰漢官儀牧師諸苑三十六所分布西邊北邊養馬三十萬頭

漢二年故秦苑園池令民得田之

平帝元始二年罷安定呼池苑為安民縣

師古曰中山之安定也

池籟

武帝元狩三年將討昆明昆明有滇池方三百里乃作

昆明池以習水戰

臣瓚曰西南夷傳有越雋昆明國有滇池方三百里漢使求身毒國而為

昆明所閉今欲伐之故作昆明池象之以習水戰在長安西南周回四十里食貨志又曰時越欲與漢用船戰

乃大修昆明池也

少府飲飛外池

元紀假與貧民

嚴籩池田

同

太液池

郊祀志揚雄傳作泰液

上林十池

百官表少府屬官有上林十池監

牛首池

司馬相如傳濯蠲牛首張楫曰牛首池名也在上林苑西

安池

霍光傳安池監賞

道路

復道

上居南宮從復道上見諸將耦語高紀如淳曰復音複上下有道故謂之復

輦道

霍光傳召內樂人輦道車首如淳曰輦道閭道也

馳道

成紀曰天子不敢絕馳道應劭曰馳道天子所行也

諸門城門附

未央宮司馬門

成紀永和四年灾

東司馬門

東方朔傳

北司馬門

五行志

殿東門上

未央宮掖門

高后紀注云門在兩旁若人之臂掖

北掖門

楊敞傳

壁門

建章宮南有壁門見郊祀志

高門

未央宮中有高門汲黯傳

端門

燕刺王傳又周勃傳師古曰殿正門也

龍樓門

成紀注云門樓上有銅龍若白鶴蜚廉之為名也

黃門

紀元

作室門

成紀

尚方掖門

成紀注云掖門者正門之旁小門也

金馬門

公孫弘王褒待詔金馬門

長秋門

未央宮殿長秋門見庚太子傳

東交門

東方朔傳

堯母門

鈞弋趙
倭仔傳

小苑東門

蕭望之補小
苑東門侯

上林延壽門

孝平王
后傳

上東門

賈誼傳雒陽上東門
師古曰東面最北門

十二城門

百官表有十二城門侯臣天麟按三輔黃圖云
都城十二門東出第一門曰霸城門第二曰清

明門北頭第一門曰宣平門南出東頭第一門曰安門

第二曰西安門又曰便門西出南頭第一門曰章城門

第二曰直城門西出北頭第一門曰雍門

東頭第一門曰高門西頭第一門曰橫門

春王城門

長安城東出北頭第一門
也舊名宣平門翟方進傳

橫城門

北城西頭第一門
見成紀建始三年

覆盆城門

劉屈氂傳
一名杜門

便門

長安城南頭第
一門薛廣德傳

雍門

趙倭仔傳注云在長
安西北孝里西南

章城門

五行志成帝元延元年章城門門壯日亡

直城門

成紀注云西出南頭第二門

譙門

陳勝傳師古曰謂門上為高樓以望者耳樓一名譙故謂美麗之譙為麗譙

鋪首

哀紀孝元廟殿門銅龜蛇鋪首鳴如淳曰門鋪首作龜蛇之形師古曰門之鋪首所以銜環者也

官寺

官寺

元紀敗壞官寺師古曰凡府庭所在皆呼為寺又何並傳注云諸官曹之所通呼為寺風俗通曰寺

嗣也理事之吏

嗣續於其中

西漢會要卷六十五

欽定四庫全書

西漢會要卷六十六

宋 徐天麟 撰

方域三

宮苑雜錄

高帝七年蕭何治未央宮立東闕北闕前殿武庫大倉
上見其壯麗甚怒謂曰天下匈匈勞苦數歲成敗未可
知是何治宮室過度也何曰天下方未定故可因以就

宮室且夫天子以四海為家非令壯麗亡以重威且毋令後世有以加也上說

武帝建元三年微行始出北至池陽西至黃山

宮名在槐里

南獵長楊東游宜春丞相御史知指乃使右輔都尉徼循長楊以東後廼私置更衣從宣曲以南十二所中休更衣投宿諸宮長楊五柞倍陽宣曲尤幸於是上以為道遠勞苦又為百姓所患廼使大中大夫吾丘壽王與待詔能用算者二人舉籍阿城以南蓋屋以東宜春以

西提封頃畝及其賈直欲除以為上林苑屬之南山又
詔中尉左右內史表屬縣草田欲以償鄠杜之民吾丘
壽王奏事上大說稱善時東方朔在傍進諫曰臣聞謙
遜靜慤天表之應應之以福驕溢靡麗天表之應應之
以異今陛下累郎臺恐其麗不高也弋獵之處恐其不
廣也如天不為變則三輔之地盡可以為苑何必蓋屋
鄠杜乎奢侈越制天為之變上林雖小臣尚以為大也
夫南山天下之阻也南有江淮北有河渭其地從隴以

東商雒以西厥壤肥饒漢興去三河之地至霸產以西
都涇渭之南此所謂天下陸海之地秦之所以虜西戎
兼山東者也其山出玉石金銀銅鐵豫章檀柘異類之
物不可勝原此百工所取給萬民所仰足也又有秔稻
黎粟桑麻竹箭之饒土宜薑芋水多蠶魚貧者得以人
給家足無飢寒之憂故鄴鎬之間號為土膏其賈畝一
金今規以為苑絕陂池水澤之利而取民膏腴之地土
乏國家之用下奪農桑之業棄成功就敗事損耗五穀

是其不可一也且盛荆棘之林而長養麋鹿廣狐兔之苑大虎狼之虛又壞人塚墓發人室廬令幼弱懷土而思耆老泣涕而悲是其不可二也經而營之垣而圃之騎馳東西車駑南北又有深溝大渠夫一日之樂不足以危無隄之輿是其不可三也故務苑囿之大不恤農時非所以強國富人也夫殷作九市之宮而諸侯畔靈王起章華之臺而楚民散秦興阿房之殿而天下亂糞土愚臣忘生觸死逆盛意犯隆指罪當萬死不勝大願

願陳泰階六符以觀天變不可不省是日因奏泰階之事上迺拜朔為大中大夫給事中賜黃金百斤然遂起

上林苑如壽王所奏云

東方朔傳

元鼎二年春起柏梁臺作承露盤高二丈大七圍以銅為之上有仙人掌以承露和玉屑飲之可以長生宮

室之修自此日盛

郊祀志

元封二年公孫卿曰僊人可見上往常遽以故不見今陛下可為館如緱氏城置脯棗神人宜可致且僊人好

樓居於是上令長安則作飛廉桂館甘泉則作益壽延
壽館使卿持節設具而候神人迺作通天臺置祠具其
下將招來神僊之屬於是甘泉更置前殿始廣諸宮室

郊祀
志下

太初元年柏梁臺災越人勇之言於武帝曰粵俗有火
災復起屋必以大用勝服之於是作建章宮度為千門
萬戶前殿度高未央其東則鳳闕高二十餘丈其西則
商中樓十里虎圈其北治大池漸臺高二十餘丈名曰

太液池中有蓬萊方丈瀛洲壺梁象海中神仙龜魚之屬其南有玉堂璧門大鳥之屬立神明井幹樓高五十

丈輦道相屬焉

郊祀志

元帝延翼奉問以得失奉以為宮室苑囿奢泰難供以故民困國虛不改其本難以末正乃上疏曰孝文皇帝躬行節儉外省繇役其時未有甘泉建章及上林中諸離宮館也未央宮又無高門武臺麒麟鳳凰白虎玉堂金華之殿獨有前殿曲臺漸臺宣室溫室承明耳孝文

欲作一臺度用百金重民之財廢而不為其積土甚至
今猶存又下遺詔不起山墳故其時天下太和百姓洽
足德流後嗣願陛下遷都正本衆制皆定亡復繕治宮
館不急之費歲可餘一年之蓄

翼奉傳

初元元年令諸宮館希御幸者勿繕治

紀

五年罷上林宮館希御幸者

成帝建始元年罷上林宮館希幸御者二十五所

元延二年十二月羽獵揚雄從以為昔在二帝三王宮

館臺榭沼池苑園林麓藪澤財足以奉郊廟御賓客充庖廚而已不奪百姓膏腴穀土桑柘之地女有餘布男有餘粟國家殷富上下交足故甘露零其庭醴泉流其唐鳳凰巢其木黃龍遊其沼麒麟臻其園神雀棲其林昔者禹任益虞而上下和草木茂成湯好田而天下用足文王園百里民以為尚小齊宣王園四十里民以為大裕民之與奪民也武帝廣開上林南至宜春鼎湖御宿昆吾旁南山而西至長楊五柞北繞黃山瀕渭而東

周袤數百里穿昆明池象滇河營建章鳳闕神明馭娑
漸臺泰液象海水周流方丈瀛洲蓬萊游觀侈靡窮妙
極麗雖頗割其三垂以贍齊民然至羽獵田車戎馬器
械儲侍營禦所崇尚泰奢麗誇詡非堯舜成湯文王三
驅之意也又恐後世復修前好不折中以泉臺故聊因

校獵賦以風

揚雄傳上

省中

昭紀長公主共養省中伏儼曰蔡邕云本為禁中門閣有禁非侍御之臣不得妄入行道豹尾中亦

為禁中孝元皇后父名禁避之故曰省中師古曰省察也言入此中皆當察視不可妄也

掖庭

武帝改永巷為掖庭

文石之陛赤墀之塗

梅福傳願一登文石之陛涉赤墀之塗應劭曰以丹淹塗泥殿上

法坐

梅福傳師古曰法座正坐也猶言法宮法駕也

內中

武紀甘泉宮內中師古曰謂後庭之室也

行內

孔光傳供養行內師古曰行內行在所之內猶言禁中也

行在所

武紀天子或在京師或出巡狩故言行在所耳

公車

東方朔傳公車上書者所詣

赤墀青瑣

元后傳孟康曰青瑣以青畫戶邊鏤中天子制也

青蒲

以青規地曰青蒲非皇后不得至此見史丹傳

呆愚

文紀未央宮東闕呆愚災師古曰呆愚連闕曲閣也以覆重刻垣墉之處其形呆愚然一曰屏也呆

音浮

珍臺閒館旋題玉英

甘泉賦應劭曰題頭也檉椽之頭皆以玉節

闌入

成紀闌入尚方掖門應劭曰無浮籍妄入宮曰闌

街市

長安四市

百官表馮翊屬官有長安四市長丞

長安西市

惠帝六年起長安西市見本紀黃圖云長安九市六市在道西三市在道東

東市

晁錯傳朝服斬東市

柳市

萬章居城西柳市本傳

章臺街

張敞為京兆尹走馬章臺街三輔舊事云長安城中八街九陌張衡西京賦云參塗夷庭野塗

相經壓里端

直隴字齊平

橐街

陳湯傳蠻夷邸在橐街

華陽街

劉屈氂妻冢首華陽街

鄉里

大率十里一亭一鄉縣大縣方百里其民稠則減稀則

曠鄉亭亦如之凡縣道邑千五百八十七鄉六千六百

二十二百官

表

中陽里

高祖居豐中陽里漢舊儀云中陽里名

尚冠里

宣帝在民間時居尚冠里本紀

長安戚里

萬石君石奮家長安戚里

陵里

萬石君傳

關

關中

關中謂咸陽秦所都也東函谷關南峽關武關西散關北蕭關故咸陽曰關中

沛公初入關武說曰秦富十倍天下地形彊可急使守

函谷關

紀文穎曰是時關在弘農縣

武帝元鼎三年徙函谷關於新安以故關為弘農縣

紀本

應劭曰時樓船將軍楊僕數有大功恥為關外民上書乞徙東關以家財給其用度武帝意亦好廣闢於是徙

關於新安志

弘農三百里

武關

高紀應劭曰秦南關也通南陽文穎曰武關在析西百七十里

峽關

應劭曰峽山之關李奇曰在上洛北藍田南武關之西

散關

蕭關

李廣傳匈奴大入蕭關如淳曰孔安定朝那縣

玉關

西域傳云在燉煌西界

陽關
同上

天井關
成紀應劭曰天井關在上黨高都

五阮關
應劭曰在代郡

壺口關
成紀應劭曰壺口在關

壺關
壺關見三老上

文帝十一年除關無用傳紀

景帝四年復置諸關用傳出入紀

武帝大初四年徙弘農都尉治武關稅出入者以給關

吏卒食紀

霍光曰函谷京師之固故以丞相弟為關都尉

魏相傳

城塞

漢二年繕治河上塞

高紀又鄧通傳注云東北謂之塞西南謂之徼也

六年令天下縣邑城紀

惠帝元年正月城長安紀

三年發長安六百里內男女十四萬六千人城長安三

十日罷紀

五月復發長安六百里內男女十四萬五千人城長安

三十日罷

九月長安城成賜民戶爵一級

文帝時晁錯請募民徙塞曰以為便之高城深塹具藺石布渠答復為一城其內城間百五十步要害之處通

川之道調立城邑無下千家為中周虎落

本傳師古曰虎落者以竹

篾相連遮蔽之也

武帝元朔三年城朔方城

大初元年築塞外受降城紀

三年遣光祿徐勳自為築五原塞外列城西北至盧朐

疆弩都尉路博德築居延

昭帝元鳳六年募郡國徙築遼東玄菟城紀

傳置

乘傳高紀五年田橫乘傳詣洛陽如淳曰律四馬高足

為置傳四馬中足為馳傳四馬下足為乘傳一馬

二馬為軺傳急者乘傳師一乘師古曰傳者若今之驛古者以車謂之傳車以後又單置馬謂之驛騎傳音張

反戀

傳置

文紀二年太僕見馬遺財足餘皆以給傳置吏記正義曰樂產云傳置一也謂乘傳者以傳受君命

乘置者以置馬取用也續漢書云

驛馬三十里一置廣雅云置驛也

傳馬

昭紀元鳳二年省乘輿馬及苑馬以補邊郡三輔傳馬

傳車

郊祀志與方士傳車

一封

平紀如淳曰律諸當乘傳及發駕置傳者皆持尺五寸木傳信封以御史大夫印章其乘

傳參封之參三也有期會累封兩端各兩封凡四封也乘置馳傳五封之兩端各二中央一也輅傳兩馬再

封之一馬一封也師古曰

以一馬駕輅車而乘傳

一乘傳

郊祀志陳寶祀每見雍太祀以大牢遣候者乘一乘傳馳詣行在所

四乘傳

司馬相如論蜀使者
馳四乘之傳見本傳

四馬傳

韓延壽傳

六乘傳

文紀張武等六人乘六乘傳
詣長安師古曰傳車六乘出

七乘傳

昌邑王傳賀乘七
乘傳詣長安邸

馳傳

陳平傳平乘馳傳
載周勃代樊噲將

軺傳

申公傳弟子一
人乘軺傳從

疾置

劉屈氂傳

騎置

李陵傳因
騎置以聞

驛騎

趙充國傳

廐置

田詹傳尸鄉廐置

置亭

馮奉世傳

傳舍

鄙食其傳師古曰傳舍者人所止息前人已去後人復來轉也傳一音張戀反謂傳置之舍也其

義兩通

縣次傳

汲黯傳匈奴叛其主降徐以縣次傳之

假輅傳

梅福求假輅傳詣行在所

亭障

高祖為泗上亭長

師古曰秦制十里一亭亭長者主亭之吏也亭謂亭留宿食之所高紀

大率十里一亭亭有長十亭一鄉縣大率方百里其民

稠則減稀則曠鄉亭亦如之皆秦制也凡縣道國邑千

五百八十七鄉六千六百二十二亭二萬九千六百三

十五

百官表

武帝元光六年南夷始置郵亭

史記大事記按是時唐蒙通西夷南治夜郎道

始成故置郵

亭比內郡焉

元鼎中天子行獵新秦中或千里無亭徼於是誅北地

太守以下食貨

志

武帝征四夷開西域自燉煌西至鹽津往往起亭

西域傳

武帝通大宛諸國使者相望於道於是漢列亭障至玉

門矣

西域傳元封六年事

武帝軍旅數起女子乘亭障賈捐之傳

大初三年匈奴入定襄雲中壞光祿諸亭障紀

狄山乘一障

張湯傳居一障間師古曰鄣為要險之處別築為城因置吏士而為障蔽以扞寇也

宣帝神爵元年趙充國奏計度臨羗東至浩亶羗虜故

田及公田可二千頃以上其間郵亭多敗壞者以前部士入山伐木六萬餘枝在水次臣願罷兵屯田以閒暇

時下所伐材繕治郵亭充入金城傳

郵亭鄉官黃霸傳師古曰郵行書舍謂傳送文書所止處亦如今之驛館矣鄉官者鄉所治處也

都亭

司馬相如傳往舍都亭師古曰臨邛所治都之亭

元帝時羗虜燔燒置亭

平帝置宗師得因郵亭書言宗伯請以聞紀

斥候

西邊北邊之郡斥侯望烽燧不得卧賈誼傳

趙充國常以遠斥侯為務傳

東南一尉西北一候揚雄解嘲

邸

大鴻臚屬官有邸邸長丞

師古曰主諸郡之邸在京師者也按郡國皆有邸所以通

奏報待朝宿也

初置邸國邸屬少府中屬中尉後屬大鴻臚表

武帝封禪詔諸侯治邸泰山下郊祀志

蠻夷邸

元紀師古曰若今鴻臚客館黃圖云蠻夷邸在城外橐街

西漢會要卷六十六

欽定四庫全書

西漢會要卷六十七

宋 徐天麟 撰

方域四

黃河

漢興三十有九年孝文時河決酸棗東潰金隄於是東
郡大興卒塞之其後三十六歲孝武元光中河決於瓠
子東南注鉅野通於淮泗上使汲黯鄭當時與人徒塞

之輒復壞是時武安侯田蚡為丞相其奉邑食郿郿居
河北河決而南則郿無水災邑收入多蚡言於上曰江
河之決皆天事未易以人力彊塞彊塞之未必應天而
望氣用數者亦以為然是以久不復塞也自河決瓠子
後二十餘歲歲因以數不登而梁楚之地尤甚上既封
禪巡祭山川其明年乾封少雨上乃使汲仁郭昌發卒
數萬人塞瓠子決河於是上以用事萬里沙則還自臨
決河湛白馬玉璧令羣臣從官自將軍以下皆負薪實

決河是時東郡燒草以故薪柴少而下淇園之竹以為
隄上既臨河決悼功之不成迺作歌曰瓠子決兮將柰
何浩浩洋洋慮殫為河殫為河兮地不得寧功無已時
兮吾山平於是卒塞瓠子築宮其上名曰宣防而道河
北行二渠復禹舊迹而梁楚之地復寧無水災是時方
事匈奴興功利言便宜者甚衆齊人延年上書言河出
昆侖經中國注勃海是其地勢西北高而東南下也可
案圖書觀地形令水工準高下開大河上領出之胡中

東注之海如此闕東長無水災北邊不憂匈奴可以省隄防備塞士卒轉輸胡寇侵盜覆軍殺將暴骨原野之患天下常備匈奴而不憂百越者以其水絕壤斷也此功一成萬世大利書奏上壯之報曰延年計議甚深然河迺大禹之所道也聖人作事為萬世功通於神明恐難改更自塞宣房後河復北決於館陶分為屯氏河東北經魏郡清河信都勃海入海廣深與大河等故因其自然不隄塞也此開通後館陶東北四五郡雖時小被

水害而兖州以南六郡無水憂宣帝地節中光祿大夫
郭昌使行河北曲三所水流之執皆邪直貝丘縣恐水
盛隄防不能禁迺各更穿渠直東經東郡界中不令北
曲渠通利百姓安之元帝永光五年河決清河靈鳴犢
口而屯氏河絕成帝初清河都尉馮遂奏言郡承河下
流與兖州東郡分水為界城郭所居尤卑下土壤輕脆
易傷頃所以濶無大害者以屯氏河通兩川分流也今
屯氏河塞靈鳴犢口又益不利獨一川兼受數河之任

雖高增堤防終不能泄如有霖雨旬日不霽必盈溢靈
鳴犢口在清河東界所在處下雖令通利猶不能為魏
郡清河減損水害禹非不愛民力以地形有執故穿九
河今既減難明屯氏河不流行七十餘年新絕未久其
處易浚又其口所居高於以分流殺水力道里便宜可
復浚以助大河泄暴水備非常又地節時郭昌穿直渠
後三歲河水更從故第二曲間北可六里復南合今其
曲執復邪直貝丘百姓寒心宜復穿渠東行不豫修治

北決病四五郡南決病十餘郡然後憂之晚矣事下丞相御史白博士許商治尚書善為算能度功用遣行視以為屯氏河盈溢所為方用度不足可且勿浚三歲河果決於館陶及東郡金隄泛濫兗豫入平原千乘濟南凡灌四郡三十二縣水居地十五萬餘頃深者三丈壤敗官亭室廬且四萬所御史大夫尹忠對方畧疏濶上切責之忠自殺遣大司農非調大司農名非調也調均錢穀河決所灌之郡謁者二人發河南以東漕船五百艘徙民

避水居丘陵九萬七千餘口河隄使者王延世使塞以竹落長四丈大九圍盛以小石兩船夾載而下之三十
六日河隄成上曰東郡河決流漂二州校尉延世隄防
三旬立塞其以五年為河平元年卒治河者為著外繇
六月惟延世長於計策功費約省用力日寡朕甚嘉之
其以延世為光祿大夫秩中二千石賜爵關內侯黃金
百斤後二歲河復決平原流入濟南千乘所壤敗者半
建始時復遣王延世治之杜欽說大將軍王鳳以為前

河決丞相史楊焉言延世受焉術以塞之蔽不肯見今
獨任延世延世見前塞之易恐其慮害不深又審如焉
言延世之巧反不如焉且水執各異不博議利害而任
一人如使不及今冬成來春桃花水盛必羨溢有填淤
反壤之害如此數郡種不得下民人流散盜賊將生雖
重誅延世無益於事宜遣焉及將作大匠許商諫大夫
乘馬延年雜作延世與焉必相破壞深論便以相難極
商延年皆明計算能商功利足以分別是非擇其善者

而從之必有成功鳳如欽言白遣馬等作治六月迺成
復賜延世黃金百斤治河卒非受平賈者為著外繇六
月後九歲鴻嘉四年楊馬言從河上下患底柱隘可鑄
廣之上從其言使馬鑄之鑄之裁沒水中不能去而今
水益湍怒為害甚於故是歲渤海清河信都河水溢溢
灌縣邑三十一敗官亭民舍四萬餘所河隄都尉許商
與丞相史孫禁共行視圖方畧禁以為今河溢之害數
倍於前決平原時今可決平原金隄間開通大河令入

故駕馬河至海五百餘里水道浚利又乾三郡水地得
美田且二十餘萬頃足以償所開傷民田廬處又省吏
卒治隄救水歲三萬人以上許商以為古說九河之名
有徒駭胡蘇鬲津今見在成平東光鬲界中自鬲以北
至徒駭間相去三百餘里今河雖數移徙不離此域孫
禁所欲開者在九河南駕馬河失水之迹處執平夷旱
則淤絕水則為敗不可許公卿皆從商言先是谷永以
為河中國之經濟聖王興則出圖書王道廢則竭絕今

潰溢橫流漂沒陵阜異之大者也修政以應之災變自
除是時李尋解先亦言陰氣盛則水為之長故一日之
間晝減夜增江河滿溢所謂水不潤下雖常於卑下之
地猶日月變見於朔望明天道有因而作也衆庶見王
延世蒙重賞競言便巧不可用議者常欲求索九河故
迹而穿之今因其自決可且勿塞以觀水執河欲居之
當稍自成川跳出沙土然後順天心而圖之必有成功
而用財力寡於是遂止不塞滿昌師丹等數言百姓可

哀上數遣使者處業振贍之哀帝初平當使領河隄奏
言九河今皆寔滅按經義治水有決河深川而無隄防
雍塞之文河從魏郡以東北多溢決水迹難以分明四
海之衆不可誣宜博求能浚川疏河者下丞相孔光大
司空何武奏請部刺史三輔三河弘農太守舉吏民能
者莫有應書待詔賈讓奏言治河有上中下策古者立
國居民疆理土地必遺川澤之分度水執所不及大川
無防小水得入陂障卑下為汗澤使秋水多得以有所

休息左右游波寬緩而不迫夫土之有川猶人之有口也治土而防其川猶止兒啼而塞其口豈不遽止然其死可立而待也故曰善為川者決之使道善為民者宣之使言蓋隄防之作近起戰國雍防百川各以自利齊與趙魏以河為竟趙魏瀕山齊地卑下作隄去河二十五里河水東抵齊隄則西泛趙魏趙魏亦為隄去河二十五里雖非其正水尚有所遊盪時至而去則填淤肥美民耕田之或以無害稍築室宅遂成聚落大水時至

漂沒則更起隄防以自救稍去其城郭排水澤而居之
湛溺自其宜也今隄防陋者去水數百步遠者數里近
黎陽南故大金隄從河西西北行至西山南頭迺折東
與東山相屬民居金隄東為廬舍住十餘歲更起隄從
東山南頭直南與故大隄會又內黃界中有澤方數十
里環之有隄住十餘歲太守以賦民民今起廬舍其中
此臣親所見者也東郡白馬故大隄亦復數重民皆居
其間從黎陽北盡魏界故大隄去河遠者數十里內亦

數重此皆前世所排也河從河內北至黎陽觀石隄激使東抵東郡平剛又為石隄使西北抵黎陽觀下又為石隄使東北抵東郡津北又為石隄使西北抵魏郡昭陽又為石隄激使東北百餘里間河再西三東迫阬如此不得安息今行上策徙冀州之民當水衝者決黎陽遮害亭放河使北入海河西薄大山東薄金隄執不能遠泛濫晷月自定難者將曰若如此敗壞城郭田廬冢墓以萬數百姓怨恨昔大禹治水山陵當路者毀之故

鑿龍門辟伊闕折底柱破碣石墮斷天地之性此迺人
功所造何足言也今瀕河十郡治隄歲費且萬萬及其
大決所殘無數如出數年治河之費以業所徙之民遵
古聖之法定山川之位使神人各處其所而不相奸且
以大漢方制萬里豈其與水爭咫尺之地哉此功一立
河定民安千載無患故謂之上策若乃多穿漕渠於冀
州地使民得以溉田分殺水怒雖非聖人法然亦救敗
術也難者將曰河水高於平田歲增隄防猶尚決溢不

可以開渠臣竊按視遮害亭西十八里至淇水口迺有金隄高一丈自是東地稍下隄稍高至遮害亭高四五丈往五六歲河水大盛增丈七尺壞黎陽南郭門入至隄下水未踰隄二尺所從隄上北望河高出民屋百姓皆走山水留十三日隄潰二所吏民塞之臣循隄上行視水勢南七十餘里至淇口水適至隄半計出地上五尺所今可從淇口以東為石隄多張水門初元中遮害亭下河去隄足數十步至今四十餘歲適至隄足由是言

之其地堅矣恐議者疑河大川難禁制滎陽漕渠足以
卜之其水門但用木與土耳今據堅地作石隄執必全
安冀州渠首盡當印此水門治渠非穿地也但為東方
一隄北行三百餘里入漳水中其西因山足高地諸渠
皆往往股引取之旱則開東方下水門溉冀州水則開
西方高門分河流通渠有三利不通有三害民常罷於
救水半失作業水行地上湊潤上徹民則病溼氣木皆
立枯鹵不生穀決溢有敗為魚鼈食此三害也若有渠

溉則鹽鹵下隰填淤加肥故種禾麥更為秔稻高田五
倍下田十倍轉漕舟船之便此三利也今瀕河隄吏卒
郡數千人伐買薪石之費歲數千萬足以通渠成水門
又民利其溉灌相率治渠雖勞不罷民田適治河隄亦
成此誠富國安民興利除害支數百歲故謂之中策若
迺繕全故隄增卑倍薄勞費無已數逢其害此最下策
也王莽時名能治河者以百數但崇空語無施行者

溝
洫

志

西漢會要卷六十七

欽定四庫全書

史部
西漢會要卷六十八至七十

詳校官編修臣范來宗

編修臣程嘉謨覆勘

總校官知縣臣楊懋珩

校對官編修臣盧遂

謄錄監生臣黃聘三

欽定四庫全書

西漢會要卷六十八

宋 徐天麟 撰

蕃夷上

匈奴

匈奴其先夏后氏之苗裔曰淳維自淳維以至頭曼千有餘歲時大時小別散分離尚矣單于頭曼有太子曰冒頓冒頓殺父自立是時漢初定徙韓王信於代都馬

邑匈奴大攻圍馬邑韓信降匈奴匈奴得信因引兵南
踰句注攻太原至晉陽下高帝自將兵往擊之會東大
寒雨雪卒之墮指者十二三於是冒頓陽敗走誘漢兵
漢逐擊冒頓冒頓匿其精兵見羸弱高帝先至平城步
兵未盡到冒頓縱精兵三十餘萬騎圍高帝於白登七
日高帝迺使使間厚遺閼氏閼氏迺謂冒頓曰兩主不
相困今得漢地單于終非能居之冒頓與韓信將王黃
趙利期而兵久不來疑其與漢有謀亦取閼氏之言迺

開圍一角於是高皇帝令士皆持滿傅矢外鄉從解角
直出得與大軍合而冒頓遂引兵去漢亦引兵罷使劉
敬結和親之約奉宗室女翁主為單于閼氏歲奉匈奴
絮繒酒食物各有數約為兄弟以和親孝惠高后時冒
頓寢驕迺為書使使遺高后曰孤債之君生於沮澤之
中長於平野牛馬之域數至邊境願遊中國陛下獨立
孤債獨居兩主不樂無以自虞願以所有易其所無高
后大怒呂丞相平及樊噲季布等議斬其使者發兵擊

之樊噲曰臣願得十萬衆橫行匈奴中季布曰噲可斬也前陳豨反於代漢兵三十二萬噲為上將軍時匈奴圍高帝於平城噲不能解圍今傷痍者甫起而噲欲搖動天下妄言以十萬衆橫行是面謾也且匈奴遠處絕漠得其善言不足喜惡言不足怒也高后曰善令大謁者張澤報書曰單于不忘敝邑賜之以書敝邑恐懼退日自圖年老氣衰髮齒墮落行步失度單于過聽不足以自汗敝邑無罪宜在見赦竊有御車二乘馬二駟以

奉常駕冒頓得書復使使來謝曰未嘗聞中國禮義陛下幸而赦之因獻馬遂和親至孝文即位復修和親其三年夏匈奴右賢王入居河南地為寇於是文帝遣丞相灌嬰將軍擊右賢王走出塞其明年單于遺漢書曰願寢兵休士養馬除前事復故約以安邊民書至漢議擊與和親孰便公卿皆曰和親甚便漢許之孝文前六年遺匈奴書曰漢與匈奴約為兄弟所遺單于甚厚背約離兄弟之親者常在匈奴然右賢王事已在赦前勿

深誅單于若稱書意明告諸吏使無負約有信敬如單于書使者言單于自將并國有功甚苦兵事服繡袷綺衣長襦錦袍各一比疎一黃金飾具帶一黃金犀毗一繡十匹錦二十四匹赤緋綠繒各四十匹使中大夫意謁者令肩遺單于後頃之冒頓死子稽粥立號曰老上單于文帝復遣宗人女翁主為單于閼氏使宦者中行說傅翁主說不欲行漢疆使之說曰必我也為漢患者中行說既至因降單于單于愛幸之日夜教單于候利害

處孝文十四年匈奴單于十四萬騎入朝那蕭闕殺北地都尉印虜人民蓄產甚多遂至彭陽使騎兵入燒回中宮候騎至雍甘泉於是文帝以中尉周舍郎中令張武為將軍發車千乘十萬騎軍長安旁以備胡寇而拜昌侯盧卿為上郡將軍寧侯魏遼為北地將軍隆慮侯周竈為隴西將軍東陽侯張相如為大將軍成侯董赤為將軍大發車騎往擊胡單于留塞內月餘漢逐出塞即還匈奴日以驕歲入邊漢甚患之迺使使遺匈奴書

單于亦使當戶報謝復言和親事孝文後二年使使遺
匈奴書曰朕與單于皆捐細故俱蹈大道也墮壞前惡
以圖長久和親之後漢過不先單于其察之後四年老
上單于死子軍臣單于立漢復與匈奴和親軍臣單于
立歲餘匈奴復絕和親大入上郡雲中各三萬騎所殺
畧甚衆於是漢使三將軍軍屯北地代屯匈奴注趙屯飛
狐口緣邊亦各堅守以備胡寇又置三將軍軍長安西
細柳渭北棘門霸上以備邊後歲餘文帝崩景帝立復

與匈奴和親通關市給遺單于遣翁主如故約終景帝
世時時小入盜邊無大寇武帝即位明和親約束厚遇
關市饒給之漢使馬邑人聶翁壹間闌出物與匈奴交
易陽為賣馬邑城以誘單于單于信之而貪馬邑財物
迺以十萬騎入武州塞漢伏兵三十餘萬馬邑旁御史
大夫韓安國為護軍將軍四將軍以伏單于單于入漢
塞見畜布野而無人牧者怪之時鴈門尉史知漢謀具
告單于單于大驚曰吾固疑之乃引兵還漢以恢本建

造兵謀而不進誅恢自是後匈奴絕和親自馬邑軍後
五歲之秋漢使四將各萬騎擊胡闕市下將軍衛青出
上谷至龍城得胡首虜七百人公孫賀出雲中無所得
公孫敖出代郡為胡所敗七千李廣出鴈門為胡所敗
匈奴生得廣廣道亡歸其明年秋匈奴二萬騎入漢殺
遼西太守畧二千餘人又敗漁陽太守軍千餘人圍將
軍安國安國時千餘騎亦且盡會燕救之至匈奴迺去
又入鴈門殺畧千餘人於是漢使將軍衛青將三萬騎

出鴈門李息出代郡擊胡得首虜數千其明年衛青復
出雲中以西至隴西擊胡之樓煩白羊王於河南得胡
首虜數千羊百餘萬於是漢遂取河南地築朔方復繕
故秦時蒙恬所為塞因河而為固漢亦築上谷之斗辟
縣造陽地以予胡是歲元朔二年也其冬軍臣單于死
其弟左谷蠡王伊穉斜自立為單于攻敗軍臣單于太
子於單於單于亡降漢數月死伊穉斜單于既立其夏匈
奴數萬騎入代郡秋又入鴈門明年又入代郡定襄上

郡匈奴右賢王怨漢奪之河南地而築朔方數寇盜邊及入河南侵擾朔方殺掠吏民甚衆其明年春漢遣衛青將六將軍十餘萬人出朔方高闕夜圍右賢王脫身逃走漢將軍得右賢王人衆男女萬五千人裨小王十餘人其明年春漢復遣大將軍衛青將六將軍十餘萬騎仍再出定襄數百里擊匈奴得首虜前後萬九千餘級而漢亦亡兩將軍三千餘騎右將軍建得以身脫而前將軍趙信兵不利降匈奴其明年胡數萬騎入上谷

殺數百人明年春漢使票騎將軍去病將萬騎出隴西過焉耆山千餘里得胡首虜八千餘級得休屠王祭天金人其夏驃騎將軍復與合騎侯數萬騎出隴西北地二千里過居延攻祁連山得胡首虜三萬餘級裨小王以下十餘人是時匈奴亦來入代郡鴈門殺掠數百人漢使博望侯及李將軍廣出右北平擊匈奴左賢王左賢王圍李廣軍四千人死者過半會博望侯軍救至李將軍得脫盡亡其軍其秋單于怒昆邪王休屠王居

西方為漢所殺虜數萬人欲召誅之昆邪王殺休屠王并將其衆降漢漢已得昆邪則隴西北地河西益漢少胡寇徙關東貧民處所奪匈奴河南地新秦中以實之西減北地以西戍卒半明年春匈奴入右北平定襄各數萬騎殺掠千餘人其年春漢令大將軍青驃騎將軍去病中分軍大將軍出定襄驃騎將軍出代咸約絕幕擊匈奴單于聞之遠其輜重以精兵待於幕北與漢大將軍接戰一日會暮大風起漢兵縱左右翼圍單于單

于自度戰不能與漢兵遂獨與壯騎數百潰漢圍西北
遁走驃騎封於狼居胥山禪姑衍臨翰海而還是後匈
奴遠遁而幕南無王庭漢度河自朔方以西至令居往
往通渠置田官吏卒五六萬人會驃騎將軍去病死於
是漢久不北擊胡數歲伊穉斜單于立十三年死子烏
維立為單于是歲元鼎三年也其後漢方南誅兩越不
擊匈奴匈奴亦不入邊烏維立三年漢已滅兩越天子
巡邊親至朔方勒兵十八萬騎以見武節而使郭吉風

告單于曰南越王頭已垂於漢北闕下令單于即能與漢戰天子自將兵待邊即不能亟南面而臣於漢何但遠走亡匿於幕北寒苦無水草之地為語卒單于大怒留郭吉不歸遷辱之北海上而單于終不肯為寇於漢邊休養士馬習射獵數使使好辭甘言求和親漢使王烏等闕匈奴匈奴法漢使不去節不以墨黥其面不得入穹廬王烏北地人習胡俗去其節黥面入廬單于愛之陽許曰吾為遣其太子入質於漢以求和親漢使楊信使於

於匈奴是時漢東拔濊貉朝鮮以為郡而西置酒泉郡以隔絕胡與羌通之路又西月氏大夏以翁主妻烏孫王以分匈奴西方之援國又北益廣田至眩雷為塞而匈奴終不敢以為言烏維單于立十歲死子詹師廬立年少號為兒單于是歲元封六年也明年春漢使浞野侯破奴將二萬騎出朔方北二千餘里期至浚稽山而還匈奴生得浞野侯軍遂沒於匈奴兒單于立三歲而死子少匈奴迺立其季父烏維單于弟右賢王句黎湖

為單于是歲太初三年也句黎湖單于立漢使光祿徐
自為出五原塞數百里遠者千里築城障列亭至盧朐
而使游擊將軍韓說長平侯衛伉屯其旁使彊弩都尉
路博德築居延澤上其秋匈奴大入雲中定襄五原朔
方殺掠數千人行壞光祿所築亭障又使右賢王入酒
泉張掖掠數千人會任文擊救盡復失其所得而去句
黎湖單于立一歲死其弟左大都尉且鞮侯立為單于
漢既誅大宛威震外國天子意欲遂困胡迺下詔曰高

皇帝遺朕平城之憂昔齊襄公復九世之讐春秋大之
是歲太初四年也漢遣中郎將蘇武厚幣賂遺單于單
于益驕禮甚倨明年漢使貳師將軍將三萬騎出酒泉
擊右賢王於天山得首虜萬餘級而還匈奴大圍貳師
幾不得脫漢兵物故什六七漢又使因杆將軍出西河
與彊弩都尉會涿邪山亡所得使騎都尉李陵將步兵
五千人出居延北千餘里與單于會合戰陵所殺傷萬
餘人兵食盡欲歸單于圍陵陵降匈奴其兵得脫歸漢

者四百人單于迺貴陵以其女妻之後二歲漢使貳師將軍六萬騎步兵七萬出朔方彊弩都尉路博德將萬餘人與貳師會游擊將軍說步兵三萬人出五原因杆將軍敖將騎萬步兵三萬人出鴈門匈奴聞悉遠其累重於余吾水北而單于以十萬待水南與貳師接戰貳師解而引歸與單于連鬪十餘日游擊亡所得因杆與左賢王戰不利引歸明年且鞮侯單于死立五年長子左賢王立為狐鹿姑單于以左大將為左賢王數年病

死其子先賢揮不得代更以為日逐王日逐王者賤於左賢王單于自以其子為左賢王單于既立六年而匈奴入上谷五原殺掠吏民其年匈奴復入五原酒泉殺兩部都尉於是漢遣貳師將軍七萬人出五原御史大夫商丘成將三萬餘人出西河重合侯莽通將四萬騎出酒泉千餘里單于聞漢兵大出悉遣其輜重徙趙信城北邸郵居水左賢王驅其人民度余吾水六七百里居兜銜山單于自將精兵左安侯度姑且水御史大夫

軍至追邪徑無所見還匈奴使大將與李陵將三萬餘騎追漢軍至浚稽山合轉戰九日漢兵陷陳卻敵殺傷虜甚衆至蒲奴水虜不利還去貳師將軍出塞匈奴使右大都尉與衛律將五千騎要擊漢軍於夫羊白山狹貳師遣屬國胡騎二千與戰虜兵壞散死傷者數百人漢軍乘勝追北匈奴奔走莫敢距敵會貳師妻子坐巫蠱收聞之憂懼其掾胡亞夫說貳師曰夫人室家皆在吏若還不稱意適與獄會貳師由是狐疑欲深入要功

長史與決眊都尉輝渠侯謀曰將軍懷異心欲危衆求
功恐必敗謀共執貳師貳師聞之斬長史引兵還至速
邪烏燕然山單于知漢軍勞倦自將五萬騎遮擊貳師
相殺傷甚衆夜塹漢軍前深數尺從後急擊之軍大亂
敗貳師降單于以女妻之尊寵在衛律上其明年單于
遣使遺漢書云南有大漢北有彊胡胡者天之驕子也
不為小禮以自煩今欲與漢聞大闕取漢女為妻歲給
遺我蘘酒萬石稷米五千斛雜繒萬匹它如故約則邊

不相盜矣漢遣使者報送其使單于留使者三歲迺得
還貳師在匈奴歲餘衛律害其寵會母閼氏病律飭胡
巫言先單于怒曰胡故時祠兵常言得貳師以社今何
故不用於是收貳師貳師罵曰我死必滅匈奴遂屠貳
師以祠武帝崩前此者漢兵深入窮追二十餘年匈奴
孕重墮殞罷極苦之後三年單于欲求和親會病死更
立子左谷蠡王為壺衍鞬單于是歲始元二年也後復
得匈奴降者言烏桓嘗發先單于冢匈奴怨之方發二

萬騎擊烏桓大將軍霍光欲發兵邀擊之以問護軍都尉趙充國充國以為蠻夷自相攻擊而發兵要之招寇生事非計也光更問中郎將范明友明友言可擊於是拜明友為度遼將軍將二萬騎出遼東匈奴聞漢兵至引去明友因乘烏桓敝擊之斬首六千餘級獲三王首還匈奴繇是恐即使使之烏孫求欲得漢公主擊烏孫取車延惡師地烏孫公主上書下公卿議救未決昭帝崩宣帝即位烏孫昆彌復上書言連為匈奴所侵削昆

彌願發國半精兵人馬五萬匹盡力擊匈奴唯天子出兵哀救公主本始二年漢大發關東輕銳士選郡國吏三百名伉健習騎射者皆從軍遣御史大夫田廣明為祁連將軍四萬餘騎出西河度遼將軍范明友三萬餘騎出張掖前將軍韓增三萬餘騎出雲中後將軍趙充國為蒲類將軍三萬餘騎出酒泉雲中太守田順為虎牙將軍三萬餘騎出五原凡五將軍兵十餘萬騎出塞各二千餘里及校尉常惠使護發兵烏孫西域昆彌自

將翕侯以下五萬餘騎從西方入與五將軍兵凡二十餘萬衆匈奴聞漢兵大出老弱犇走歐蓄產遠遁逃是以五將少所得度遠將軍出塞千二百餘里至蒲離候水斬首捕虜七百餘級前將軍出塞千二百餘里至烏貲斬首捕虜至候山百餘級蒲類將軍兵當與烏孫合擊匈奴蒲類澤烏孫先期至而去漢兵不與相及蒲類將軍出塞千八百餘里西去候山斬首捕虜得單于使者蒲陰王以下三百餘級祁連將軍出塞千六百里至

雞秩山斬首捕虜十九級虎牙將軍出塞八百餘里至
丹余吾水上即止兵不進斬首捕虜千九百餘級校尉
常惠與烏孫兵至右谷蠡庭獲單于父行及嫂居次名
王犁汗都尉千長將以下三萬九千餘級虜馬牛羊驢
羸橐駝七十餘萬漢封惠為長羅侯然匈奴民衆死傷
而去者及蓄產遠移死亡不可勝數於是匈奴遂衰耗
怨烏孫其冬單于自將數萬騎擊烏孫頗得老弱欲還
會天大雨雪一日深丈餘人民蓄產凍死還者不能什

一於是丁令乘弱攻其北烏桓入其東烏孫擊其西凡三國所殺數萬級馬數萬匹牛羊甚衆又重以餓死人民死者什三蓄產什五匈奴大虛弱諸國羈屬者皆瓦解攻盜不能理其後漢出三千餘騎為三道並入匈奴捕虜得數千人還匈奴終不敢取當茲欲鄉和親而邊境少事矣壺衍鞬單于立十七年死弟左賢王立為虛閭權渠單于是歲地節二年也虛閭權渠單于立九年死握衍朐鞬單于立復修和親遣弟伊酋若王勝之入

漢獻見日逐王素與握衍胸鞬單于有隙即率其衆數萬騎歸漢漢封日逐王為歸德侯時單于已立二歲暴虐殺伐國中不附及太子左賢王數說左地貴人左地貴人皆怨其明年烏桓擊匈奴東邊姑夕王頗得人民單于怒姑夕王恐即與烏禪幕及左地貴人共立稽侯獬為呼韓邪單于發左地兵四五萬人西擊握衍胸鞬單于至姑且水北未戰握衍胸鞬單于兵敗走自殺左大且渠都隆奇亡之右賢王所其民衆盡降呼韓邪單

于是歲神爵四年也

呼韓邪單于歸庭數月罷兵使各歸故地乃收其兄呼屠吾斯在民間者立為左谷蠡王使人告右賢貴人欲令殺右賢王其冬都隆奇與右賢王共立日逐王薄胥堂為屠耆單于發兵數萬人東襲呼韓邪單于呼韓邪單于兵敗走屠耆單于還以其長子都塗吾西為左谷蠡王少子姑瞽樓頭為右谷蠡王留居單于庭明年秋屠耆單于使日逐王先賢揮兄右奧鞬王為烏藉都尉

各二萬騎屯東方以備呼韓邪單于是時西方呼揭王來與唯犂當戶謀共護右賢王言欲自立為烏藉單于屠耆單于殺右賢王父子後知其寃復殺唯犂當戶於是呼揭王恐遂畔去自立為呼揭單于右奧鞬王聞之即自立為車犂單于烏藉都尉亦自立為烏藉單于凡五單于屠耆單于自將兵東擊車犂單于使都隆奇擊烏藉烏藉車犂皆敗西北走與呼揭單于兵合為四萬人烏藉呼揭皆去單于號共并力尊輔車犂單于屠耆

單于聞之使左大將都尉將四萬騎分屯東方以備呼
韓邪單于自將四萬騎西擊車犁單于車犁單于敗西
北走屠耆單于即引西南留闐敦地其明年呼韓邪單
于遣其弟右谷蠡王等西襲屠耆單于屯兵殺畧萬餘
人屠耆單于聞之即自將六萬騎擊呼韓邪單于行千里
未至呼姑地逢呼韓邪單于兵可四萬人合戰屠耆單
于兵敗自殺都隆奇乃與屠耆少子左谷蠡王姑瞿樓
頭亡歸漢車犁單于東降呼韓邪單于呼韓邪單于左

大將烏厲屈與父呼遼累烏厲溫敦皆見匈奴亂率其衆數萬人南降漢封烏厲屈為新城侯烏厲溫敦為義陽侯是時李陵子復立烏藉都尉為單于呼韓邪單于捕斬之遂復都單于庭然衆裁數萬人屠耆單于從弟休旬王將所主五六百騎擊殺左大且渠并其兵至右地自立為閏振單于在西邊其後呼韓邪單于兄左賢王呼屠吾斯亦自立為邳支骨都侯單于在東邊其後二年閏振單于率其衆東擊邳支單于邳支單于與戰

殺之并其兵遂進攻呼韓邪呼韓邪破其兵走郅支都
單于庭呼韓邪之敗也左伊秩訾王為呼韓邪計勸令
稱臣入朝事漢從漢求助如此匈奴乃定呼韓邪議問
諸大臣皆曰匈奴之俗本上氣力而下服役以馬上戰
鬪為國故有威名於百蠻戰死壯士所有也今兄弟爭
國不在兄則在弟雖死猶有威名子孫常長諸國漢雖
疆猶不能兼并匈奴柰何亂先古之制臣事於漢卑辱
先單于為諸國所笑雖如是而安何以復長百蠻左伊

秩訾曰不然彊弱有時今漢方盛烏孫城郭諸國皆為
臣妾今事漢則安存不事則危亡呼韓邪從其計引衆
南近塞遣子右賢王銖婁渠堂入侍郅支單于亦遣子
右大將駒于利受入侍是歲甘露元年也明年呼韓邪
單于歎五原塞願朝三年正月漢遣車騎都尉韓昌迎
發過所七郡郡二千騎為陳道上單于正月朝天子于
甘泉宮漢寵以殊禮位在諸侯王上贊謁稱臣而不名
賜以冠帶衣裳黃金璽蓋綬玉具劔佩刀弓一張矢四

發榮戟十安車一乘鞍勒一具馬十五匹金二十斤錢二十萬衣被七十七襲錦繡綺縠雜帛八千匹絮六千斤單于就邸留月餘遣歸國邳支單于亦遣使奉獻漢遇之甚厚明年兩單于俱遣使朝獻漢待呼韓邪使有加明年呼韓邪單于復入朝禮賜如初加衣百一十襲錦帛九千匹絮八千斤始邳支單于以為呼韓邪降漢兵弱不能復自還即引其衆西欲攻定右地又屠耆單于小弟本侍呼韓邪亦亡之右地收兩兄餘兵得數千

人自立為伊利目單于道逢郅支合戰郅支殺之并其
兵五萬餘人聞漢出兵穀助呼韓邪即遂留居右地自
度力不能定匈奴乃益西近烏孫欲與并力遣使見小
昆彌烏就屠烏就屠見呼韓邪為漢所擁郅支亡虜欲
攻之以稱漢乃殺郅支使持頭送都護在所發八千騎
迎郅支郅支見烏孫兵多其使又不反勒兵逢擊烏孫
破之因北擊烏揭烏揭降發其兵西破堅昆北降丁令
并三國數遣兵擊烏孫常勝之堅昆東去單于庭七千

里南去車師五千里郅支留都之元帝初即位呼韓邪
單于復上書言民衆困乏漢詔雲中五原郡轉穀二萬
斛以給焉郅支單于自以道遠又怨漢擁護呼韓邪遣
使上書求侍子漢遣谷吉送之郅支殺吉漢不知吉音
問而匈奴降者言聞甌脫皆殺之呼韓邪單于使來漢
輒簿責之甚急明年漢遣車騎都尉韓昌光祿大夫張
猛送呼韓邪侍子求問吉等因赦其罪勿令自疑昌猛
見單于民衆益盛塞下禽獸盡單于足以自衛不畏郅

支聞其大臣多勸單于北歸者恐北去後難約束昌猛
即與為盟約曰自今以來漢與匈奴合為一家世世毋
得相詐相攻其後呼韓邪竟北歸庭人衆稍稍歸之國
中遂定郅支既殺使者自知負漢又聞呼韓邪益彊恐
見襲擊欲遠去會康居王數為烏孫所困與諸閼侯計
以為匈奴大國烏孫素服屬之今郅支單于困阨在外
可安置東邊使合兵取烏孫以立長無匈奴憂矣即使
使至堅昆通語郅支郅支素恐又怨烏孫聞康居計大

說遂與相結引兵而西康居亦遣貴人橐駝驢馬數千
匹迎邳支邳支人衆中寒道死餘財三千人到康居其
後都護甘延壽與副陳湯發兵即康居誅斬邳支邳支
既誅呼韓邪單于且喜且懼上書言曰常願謁見天子
誠以邳支在西方恐其與烏孫俱來擊臣以故未得至
漢今邳支已伏誅願入朝見竟寧元年單于復入朝禮
賜如初加衣服錦帛絮皆倍於黃龍時單于自言願壻
漢氏以自親元帝以後宮良家子王牆字昭君賜單于

單于驩喜上書願保塞上谷以西至敦煌傳之無窮請
罷邊備塞吏卒以休天子人民天子令下有司議議者
皆以為便郎中侯應習邊事以為不可許對奏天子有
詔勿議罷邊塞事王昭君號寧胡閼氏生一男伊屠智
牙師為右日逐王呼韓邪立二十八年建始二年死雕
陶莫臯立為復株朶若鞮單于復株朶若鞮單于立遣
子右致盧兒王醯諧屠奴侯入侍河平元年單于遣右
臯林王伊邪莫演等奉獻朝正月河平四年正月遂入

朝加賜繡繒帛二萬匹絮二萬斤它如竟寧時復株象單于立十歲死弟且糜胥立為搜諧若鞮單于搜諧若鞮單于立遣子左祝都韓王胸留斯侯入侍以且莫車為左賢王搜諧單于立八歲元延元年為朝二年發行未入塞病死弟且莫車立為車牙若鞮單于車牙單于立遣子右於涂仇揮王烏夷當入侍以囊知牙斯為左賢王車牙單于立四歲死弟囊知牙斯立為烏珠留若鞮單于烏珠留單于立以第二閼氏子樂為左賢王以第

五關氏子與為右賢王遣子右股奴王烏鞬牙斯入侍
建平四年單于上書願朝五年時哀帝被疾或言匈奴
從上游來厭人自黃龍竟寧時單于朝中國輒有大故
上由是難之以問公卿亦以為虛費府帑可且勿許單
于使辭去未發黃門郎揚雄上書諫曰今單于上書求
朝國家不許而辭之臣愚以為漢與匈奴從此隙矣書
奏天子悟焉召還匈奴使者更報單于書而許之賜繒
帛五十匹黃金十斤單于未發會病復遣使願朝明年

故事單于朝從名王以下及從者二百餘人單于又上書言蒙天子神靈人民盛壯願從五百人入朝以明天子盛德上皆許之元壽二年單于來朝上大歲厭勝所在舍之上林苑蒲陶宮告之以加敬於單于單于知之加賜衣三百七十襲錦繡繒帛三萬匹絮三萬斤他如河平時既罷遣中郎將韓況送單于初上遣稽留昆隨單于去到國復遣稽留昆同母兄大且方與婦入侍還歸復遣且方同母兄左日逐王都與婦入侍是時漢平

帝幼太皇太后稱制王莽秉政迺風單于令遣王昭君女須卜居次云入侍太后所以賞賜之甚厚會西域車師後王句姑去胡來王唐兜皆怨恨都護校尉將妻子人民亡降匈奴單于受置左谷蠡地遣使上書言狀曰臣謹已受詔遣中郎將韓隆王昌副校尉甄阜侍中謁者帛敞長水校尉王歙使匈奴告單于曰西域內屬不當得受今遣之單于叩頭謝罪執二虜還付使者詔使中郎將王萌待西域惡都奴界上逆受單于遣使送到

國因請其罪使者以聞有詔不聽會西域諸國王斬以示之迺造設四條中國人亡入匈奴者烏孫亡降匈奴者西域諸國佩中國印綬降匈奴者烏桓降匈奴者皆不得受遣中郎將王駿王昌副校尉甄阜王尋使匈奴班四條與單于雜函封付單于令奉行因收故宣帝所為約束封函還時莽奏令中國不得有二名因使使者以風單于宜上書慕化為一名單于從之上書言幸得備藩臣竊樂太平聖制臣故名囊知牙斯今謹更名曰

知莽大說白太后遣使者答諭厚賞賜焉

匈奴傳

西漢會要卷六十八

欽定四庫全書

西漢會要卷六十九

宋 徐天麟 撰

蕃夷中

西南夷

南夷君長以十數夜郎最大其西靡莫之屬以十數滇
最大自滇以此君長以十數印都最大此皆椎結耕田
有邑聚其外西自桐師以東北至葉榆名為雋昆明編

髮隨畜移徙亡常處亡君長地方可數千里自雋以東
北君長以十數徙祚都最大自祚以東北君長以十數
冉駝最大其俗或土著或移徙在蜀之西自駝以東北君
長以十數白馬最大皆氐類也此皆巴蜀西南外蠻夷
也建元六年大行王恢擊東粵東粵殺王郢以報恢因
兵威使番禺令唐蒙風曉南粵南粵食蒙蜀枸醬蒙問
所從來曰道西北牂柯江江廣數里出番禺城下蒙歸
至長安問蜀賈人獨蜀出枸醬多持竊出市夜郎夜郎

者臨牂牁江江廣百餘步足以行船南粵以財物役屬
夜郎西至桐師然亦不能臣使也蒙迺上書說上曰南
粵王黃屋左纛地東西萬餘里名為外臣實一州主今
以長沙豫章徃水道多絕難行竊聞夜郎所有精兵可
得十萬浮船牂牁出不意此制粵一奇也誠以漢之疆
巴蜀之饒通夜郎道為置吏甚易上許之乃拜蒙以中
郎將將千人食重萬餘人從巴柝闖入遂見夜郎侯多
同厚賜諭以威德約為置吏使其子為令夜郎旁小邑

皆貪漢繒帛以為漢道險終不能有也迺且聽蒙約還報迺以為健為郡發巴蜀卒治道自犍道指牂牁江蜀人司馬相如亦言西夷印笮可置郡使相如以中郎將往諭皆如南夷為置一都尉十餘縣屬蜀當是時巴蜀四郡通西南夷道載轉相餽數歲道不通士罷餓餒離暑濕死者甚衆西南夷又數反發兵興擊耗費亡功上患之使公孫弘往視問焉還報言其不便及弘為御史大夫時方築朔方據河逐胡弘等因言西南夷為害可

且罷專力事匈奴上許之罷西夷獨置南夷兩縣一都尉稍令犍為自保就及元狩元年博望侯張騫言使大夏時見蜀布印竹杖問所從來曰從東南身毒國可數千里得蜀賈人市或問印西可二千里有身毒國騫因盛言大夏在漢西南慕中國患匈奴隔其道誠通蜀身毒國道便近又亡害於是天子乃令王然于栢始昌呂越人等十餘輩間出西南夷指求身毒國至滇滇王當羌迺留為求道四歲餘皆閉昆明莫能通滇王與漢使

言漢孰與我大及夜郎侯亦然各自以一州王不知漢
廣大使者還因盛言滇大國足事親附天子注意焉及
至南粵反上使馳義侯因捷為發南夷兵且蘭君恐遠
行旁國虜其老弱乃與其衆反殺使者及捷為太守漢
迺發巴蜀罪人當擊南粵者八校尉擊之會越已破漢
八校尉不下中郎將郭昌衛廣引兵還行誅隔滇道者
且蘭斬首數萬遂平南夷為牂柯郡夜郎侯始倚南粵
南粵已滅還誅反者夜郎遂入朝上以為夜郎王南粵

破後及漢誅且蘭印君并殺祚侯冉駹皆震恐請臣置
吏以印都為粵雋郡祚都為沈黎郡冉駹為文山郡廣
漢西白馬為武都郡使王然于以粵破及誅南夷兵威
風諭滇王入朝滇王者其衆數萬人其旁東北勞深靡
莫皆同姓相杖未肯聽勞莫數侵犯使者吏卒元封二
年天子發巴蜀兵擊滅勞深靡莫以兵臨滇滇王始首
善以故弗誅滇王離西夷滇舉國降請置吏入朝於是
以為益州郡賜滇王王印復長其民西南夷君長以百

數獨夜郎滇受王印滇小邑也最寵焉後二十三歲孝
昭始元元年益州廉頭姑繒民反殺長吏牂柯談指同
並等二十四邑凡三萬餘人皆反遣水衡都尉發蜀郡
捷為犇命萬餘人擊牂柯大破之後三歲姑繒葉榆復
反遣水衡都尉呂辟胡將郡兵擊之辟胡不進蠻夷遂
殺益州太守乘勝與辟胡戰士戰及溺死者四千餘人
明年復遣軍正王平與大鴻臚田廣明等並進大破益
州斬首捕虜五萬餘級獲蓄產十餘萬上曰鈞町侯亡

波卒其邑君長人民擊反者斬首捕虜有功其立亡波
為鈞町王大鴻臚廣明賜爵關內侯食邑三百戶後間
歲武都氐人反遣執金吾馬適建龍頤侯韓增與大鴻
臚廣明將兵擊之至成帝河平中夜郎王興與鈞町王
禹漏卧侯俞更舉兵相攻牂柯太守請發兵誅興等議
者以為道遠不可擊迺遣大中大夫蜀郡張匡持節和
解興等不從命刻木象漢吏立道旁射之杜欽說大將
軍王鳳宜因其罪惡未成未疑漢家加誅陰敕旁郡守

尉練士馬大司農豫調穀積要害處選任職太守往以
秋涼時入誅其王侯尤不軌者即以為不毛之地亡用
之民聖王不以勞中國宜罷郡放棄其民絕其王侯勿
復通如以先帝所立累世之功不可墮壞亦宜因其萌
牙早斷絕之及已成形然後戰師則萬姓被害大將軍
鳳於是薦金城司馬陳立為牂柯太守及至牂柯諭告
夜郎王興興不從命立請誅之未報迺從吏數十人出
行縣至興國且同亭召興興將數千人往至亭從邑君

數十人入見立立數責因斷頭邑君曰將軍誅亡狀為
民除害願出曉士衆以興頭示之皆釋兵降鈞町王禹
漏卧侯俞震恐入粟千斛牛羊勞吏士立還歸郡興妻
父翁指與興子邪務收餘兵迫脅旁二十二邑反至冬
立奏募諸夷與都尉長史分將攻翁指等翁指據阬為
壘立使竒兵絕其饗道縱反間以誘其衆都尉萬年曰
兵久不決費不可共引兵獨進敗走趨立營立怒叱戲
下令格之都尉復還戰立引兵救之時天大旱立攻絕

其水道蠻夷共斬翁指持首出降

南粵

南粵王趙佗真定人也秦二世時南海尉任囂病且死
召龍川令趙佗書行南海尉事囂死佗即擊并桂林象
郡自立為南粵武王高帝已定天下為中國勞苦故釋
佗不誅十一年遣陸賈立佗為南粵王高后時有司請
禁粵關市鐵器佗曰此必長沙王計乃自尊號為南武
帝發兵攻長沙邊敗數縣焉高后遣將軍隆慮侯竈擊

之會暑濕士卒大疫兵不能踰嶺歲餘高后崩即罷兵
佗因此以兵威財物賂遣閩粵西甌駱役屬焉東西萬
餘里迺乘黃屋左纛稱制與中國侔文帝元年初鎮撫
天下使告諸侯四夷從代來即位意諭盛德焉迺為佗
親冢在真定置守邑歲時奉祀召其從昆弟尊官厚賜
寵之詔丞相平舉可使粵者平言陸賈先帝時使粵上
召賈為大中大夫謁者一人為副使賜佗書曰服領以
南王自治之雖然王之號為帝兩帝並立亡一乘之使

以通其道是爭也爭而不遜仁者不為也願與王分棄
前患終今以來通使如故故使賈馳諭告王朕意王亦
受之母為寇災矣上褚五十衣中褚三十衣下褚二十
衣遺王願王聽樂娛憂存問鄰國陸賈至南粵王恐乃
頓首謝願奉明詔長為藩臣奉貢職於是下令國中曰
吾聞兩雄不俱立兩賢不並世漢皇帝賢天子自今以
來去帝制黃屋左纛因為書稱蠻夷大長老夫臣佗昧
死再拜上書皇帝陛下今陛下幸哀憐復故號通使漢

如故老夫死骨不腐改號不敢為帝矣謹北面因使者獻白璧一雙翠鳥千犀角十紫貝五百桂蠹一器生翠四十隻孔雀二隻昧死再拜以聞皇帝陛下陸賈還報文帝大說遂至孝景時稱臣遣使入朝請然其居國竊如故號其使天子稱王朝命如諸侯至武帝建元四年佗孫胡為南粵王立三年閩粵王郢興兵南擊邊邑胡使人上書曰兩粵俱為藩臣毋擅興兵相攻擊今東粵擅興兵侵臣臣不敢興兵唯天子詔之於是天子多南粵

義守職約為興兵遣兩將軍往討閩粵兵未踰嶺閩粵
王弟餘善殺郢以降於是罷兵天子使嚴助往諭意南
粵王胡頓首曰天子迺興兵誅閩粵死亡以報德遣太
子嬰齊入宿衛謂助曰國新被寇使者行矣胡方日夜
裝入見天子助去後其大臣諫胡曰漢興兵誅郢亦行
以驚動南粵且先王言事天子期毋失禮要之不可以
怵好語入見入見則不得復歸亡國之勢也於是胡稱
病竟不入見後十餘歲胡實病甚太子嬰齊請歸胡薨

謚曰文王嬰齊嗣立即藏其先武帝文帝重嬰齊在長
安時取邯鄲嫪氏女生子興及即位上書請立嫪氏女
為后興為嗣漢數使使者風諭嬰齊猶尚樂擅殺生自
恣懼入見要以用漢法比內諸侯固稱病遂不入見遣
子次公入宿衛嬰齊薨謚為明王太子興嗣立其母為
太后太后自未為嬰齊妻時嘗與霸陵人安國少季通
及嬰齊薨後元鼎四年漢使安國少季諭王王太后入
朝令辯士諫大夫終軍等宣其辭勇士魏臣等輔其決

衛尉路博德將兵屯桂陽待使者王年少太后中國人安國少季徃復與私通國人頗知之多不附太后太后恐亂起亦欲倚漢威勸王及幸臣求內屬即因使者上書請比內諸侯三歲一朝除邊關於是天子許之賜其丞相呂嘉銀印及內史中尉太傅印餘得自置除其故黥劓刑用漢法諸使者留填撫之王王太后飭治行裝重資為入朝具相呂嘉數諫止王王不聽有畔心迺陰謀作亂天子遣千秋與太后弟摎樂將兵二千人徃入

粵境呂嘉迺遂反攻殺太后王盡殺漢使者遣人告蒼
梧秦王及其諸郡縣立明王長男粵妻子術陽侯建德
為王而韓千秋兵之入也破數小邑其後粵直開道給
食未至番禺四十里粵以兵擊千秋等滅之使人函封
漢使節置塞上好為謾辭謝罪發兵守要害處於是天
子令粵人及江淮以南樓船十萬師往討之元鼎五年
秋衛尉路博德為伏波將軍出桂陽下湟水主爵都尉
楊僕為樓船將軍出豫章下橫浦故歸義粵侯二人為

戈船下瀨將軍出零陵或下離水或抵蒼梧使馳義侯
因巴蜀罪人發夜郎兵下牂柯江咸會番禺六年冬樓
船將軍將精卒先陷尋陔破石門得粵船粟因推而前
挫粵鋒以粵數萬人待伏波將軍伏波將軍將罪人道
遠後期與樓船會迺有千餘人遂俱進樓船居前至番
禺建德嘉皆城守樓船自擇便處居東南面伏波居西
北面會暮樓船攻敗粵人縱火燒城粵素聞伏波莫不
知其兵多少伏波乃為營遣使招降者賜印綬復縱令

相招樓船力攻燒敵反毆而入伏波營中暹旦城中皆降伏波呂嘉建德以夜與其屬數百人亡入海伏波又問降者知嘉所之遣人追故其校司馬蘇弘得建德粵郎都尉稽得嘉南粵已平遂以其地為儋耳珠崖南海蒼梧鬱林合浦交趾九真日南九郡

閩粵

閩粵王無諸及粵東海王搖其先皆粵王句踐之後也姓騶氏秦并天下廢為君長以其地為閩中郡及諸侯

畔秦無諸搖率粵歸番陽令吳芮所為番君者也從諸
侯滅秦當是時項王主命不王也以故不佐楚漢擊項
籍無諸搖帥粵人佐漢漢五年復位無諸為閩粵王王
閩中故地都冶孝惠三年舉高帝時粵功曰閩君搖功
多其民便附迺立搖為東海王都東甌世號曰東甌王
后數世孝景三年吳王濞反欲從閩粵閩粵未肯行獨
東甌從及吳破東甌受漢募殺吳王丹徒以故得不誅
吳王子駒亡走閩粵怨東甌殺其父常勸閩粵擊東甌

建元三年閩粵發兵圍東甌東甌使人告急天子天子
問太尉田蚡蚡對曰粵人相攻擊固其常不足以煩中
國往救也中大夫嚴助詰蚡言當救天子遣助發會稽
郡兵浮海救之漢兵未至閩粵引兵去東甌請舉國徙
中國迺悉與衆處江淮之間六年閩粵擊南粵南粵守
天子約不敢擅發兵而以聞上遣大行王恢出豫章大
司農韓安國出會稽皆為將軍兵未踰嶺閩粵王郢發
兵距險其弟餘善與宗族謀曰王以擅發兵不請故天

子兵來誅漢兵衆彊即幸勝之後來益多滅國乃止今
殺王以謝天子天子罷兵固國完不聽迺力戰不勝即
亡入海皆曰善即縱殺王使使奉其頭致大行大行曰
所為來者誅王王頭至不戰而殞利莫大焉迺以便宜
案兵告大司農軍而使使奉王頭馳報天子詔罷兩將
軍兵曰郢等首惡獨無諸孫繇君丑不與謀乃使中郎
將立丑為粵繇王奉閩粵祭祀餘善以殺郢威行國中
民多屬竊自立為王繇王不能制上聞之為餘善不足

復興師曰餘善首誅郢師得不勞因立餘善為東粵王
與繇王並處至元鼎五年南粵反餘善上書請以卒八
千從樓船擊呂嘉等兵至揭陽以海風波為解不行持
兩端陰使南粵及漢破番禺樓船將軍僕上書願請引
兵擊東粵上以士卒勞倦不許罷兵令諸校留屯豫章
梅領待命明年秋餘善聞樓船請誅之漢兵留境且往
迺遂發兵距漢道號將軍騶力等為吞漢將軍入白砂
武林梅領殺漢三校尉是時漢使大司農張成故山州

侯齒將屯不敢擊卻就便處皆坐畏懦誅餘善刻武帝
璽自立詐其民為妄言上遣橫海將軍韓說出句章浮
海從東方往樓船將軍僕出武林中尉王溫舒出梅領
粵侯為戈船下瀨將軍出如邪白沙元封元年冬咸入
東粵自兵未往故粵衍侯吳陽前在漢漢使歸諭餘善
不聽及橫海軍至陽以其邑七百人反攻粵軍於漢陽
及故粵建成侯敖與繇王居股謀俱殺餘善以其眾降
橫海將軍封居股為東成侯萬戶封敖為開陵侯封陽

為卵石侯於是天子曰東粵陘多阻閩粵悍數反覆詔
軍吏皆將其民徙處江淮之間東粵地遂虛

朝鮮

朝鮮王滿燕人自始燕時嘗畧屬真番朝鮮為置吏築
障秦滅燕屬遼東外徼漢興為遠難守復修遼東故塞
至涓水為界屬燕燕王盧綰反入匈奴滿亡命聚黨千
餘人椎結蠻夷服而東走出塞度涓水居秦故空地上
下障稍役屬真番朝鮮蠻夷及故燕齊亡在者王之都

王險會孝惠高后初定天下遼東太守即約滿為外臣
保塞外蠻夷傳子至孫右渠所誘漢亡人滋多又未嘗
入見真番辰國欲上書見天子又雍闕弗通元封二年
漢使涉何譙諭右渠終不肯奉詔何去至界臨涓水使
馭刺殺送何者朝鮮裨王長即度水馳入塞遂歸報天
子曰殺朝鮮將上為其名美弗詰拜何為遼東東部都尉
朝鮮怨何發兵攻襲殺何天子募罪人擊朝鮮其秋遣
樓船將軍楊僕從齊浮勃海兵五萬左將軍荀彘出遼

東誅右渠右渠發兵距險左將軍卒多率遠東士兵先
縱敗散多還走坐法斬樓船將齊兵七千人先至王險
右渠城守窺知樓船軍少即出擊樓船樓船軍敗走將
軍僕失其衆遁山中十餘日稍求收散卒復聚左將軍
擊朝鮮沮水西軍未能破左將軍數與樓船期戰樓船
欲就其約不會左將軍亦使人求間隙降下朝鮮不肯
心附樓船以故兩將不相得左將軍心意樓船前有失
軍罪今與朝鮮和善而又不降疑其有反計未敢發天

子曰兩將圍城又乖異以故久不決使故濟南太守公
孫遂往正之有便宜得以從事遂至左將軍曰朝鮮當
下久矣不下者樓船數期不會具以素所意告遂曰今
如此不取恐為大害非獨樓船又且與朝鮮共滅吾軍
遂亦以為然而以節召樓船將軍入左將軍軍計事即
令左將軍戲下執縛樓船將軍并其軍以報天子許遂
左將軍并兵兩軍即急擊朝鮮相路人相韓陶尼谿相
參將軍王峽相與謀曰始欲降樓船樓船今執獨左將

軍并將戰益急恐不能與王又不肯降陶峽路人道死
元封三年夏尼谿相參迺使人殺朝鮮王右渠來降王
險城未下故右渠之大臣成已又反復攻吏左將軍使
右渠子長降相路人子最告諭其民誅成已故遂定朝
鮮為真番臨屯樂浪玄菟四郡

西漢會要卷六十九

欽定四庫全書

西漢會要卷七十

宋 徐天麟 撰

蕃夷下

西域

西域以孝武時始通本三十六國其後稍分至五十餘
皆在匈奴之西烏孫之南南北有大山中央有河東西
六千餘里南北千餘里東則接漢阨以玉門陽關西則

限以葱嶺其南山東出金城與漢南山屬焉其河有兩原一出葱嶺山一出于閩于閩在南山下其河北流與葱嶺河合東注蒲昌海蒲昌海一名鹽澤者也去玉門陽關三百餘里廣袤三百里其水亭居冬夏不增減皆以為潛行地下南出於積石為中國河云漢興至於孝武事征四夷廣威德而張騫始開西域之迹其後驃騎將軍擊破匈奴右地降渾邪休屠王遂空其地始築令居以西初置酒泉郡後稍發徙民充實之分置武威張

掖敦煌列四郡據兩關焉自貳師將軍伐大宛之後西域震懼多遣使來貢獻漢使西域者益得職於是自敦煌西至鹽澤往往起亭而輪臺渠犂皆有田卒數百人置使者校尉領護以給使外國者至宣帝時遣衛司馬使護鄯善以西數國及破姑師未盡殄分以為車師前後王及山北六國時漢獨護南道未能盡并北道也然匈奴不自安矣其後日逐王畔單于將衆來降護鄯善以西使者鄭吉迎之既至漢封日逐王為歸德侯吉為

安遠侯是歲神爵三年也乃因使吉護北道故號曰都護都護之起自吉置矣僮僕都尉由此罷匈奴益弱不得近西域於是徙屯田於北胥鞬披莎車之地屯田校尉始屬都護都護督察烏孫康居諸外國動靜有變以聞可安輯安輯之可擊擊之都尉治烏壘城去陽關二千七百三十八里與渠犂田官相近土地肥饒於西域為中故都護治焉至元帝時復置戊己校尉屯田車師前王庭是時匈奴東蒲類王茲力支將人衆千七百餘

人降都護都護分車師後王之西為烏貪訾離地以處之自宣元後單于稱藩臣西域服從其土地山川王侯戶數道里遠近翔實矣

婁羌國

鄯善國

且末國

小宛國

精絕國

戎盧國

扞彌國

渠勒國

于闐國

皮山國

烏秣國

西夜國

蒲犂國

依耐國

無雷國

難兜國

蜀賓國

烏弋山離國

安息國

大月氏國

康居國

奄蔡國

大宛國

桃槐國

休循國

捐毒國

莎車國

疏勒國

尉頭國

烏孫國

姑墨國

溫宿國

龜茲國

烏壘國

渠犂城

尉犂國

危須國

焉耆國

烏貪訶離國

卑陸國

卑陸後國

都立師國

單桓國

蒲類國

蒲類後國

西且彌國

東且彌國

劫國

狐胡國

山國

車師前國

車師後國

車師都尉國

車師後城長國

初武帝感張騫之言甘心欲通大宛諸國使者相望於道一歲中多至十餘輩樓蘭姑師當道苦之攻劫漢使王恢等又數為匈奴耳目令其兵遮漢使漢使多言其

國有城邑兵弱易擊於是武帝遣從票侯趙破奴將屬國騎及郡兵數萬擊姑師王恢數為樓蘭所苦上令恢佐破奴將兵破奴與輕騎七百人先至虜樓蘭王遂破姑師因暴兵威以動烏孫大宛之屬還封破奴為浞野侯恢為浩侯於是漢列亭障至玉門矣樓蘭既降服貢獻匈奴聞發兵擊之於是樓蘭遣一子質匈奴一子質漢後貳師軍擊大宛匈奴欲遮之貳師兵盛不敢當即遣騎因樓蘭候漢使後過者欲絕勿通時漢軍正任文

將兵屯玉門關為貳師後距捕得生口知狀以聞上詔
文便道引兵捕樓蘭王將詣闕簿責王對曰小國在大
國間不兩屬無以自安願徙國入居漢地上直其言遣
歸國亦因使候伺匈奴匈奴自是不甚親信樓蘭征和
元年樓蘭王死國人來請質子在漢者欲立之質子常
坐漢法下蠶室宮刑故不遣報曰侍子天子愛之不能
遣其更立其次當立者樓蘭更立王漢復責其質子亦
遣一子質匈奴後王又死匈奴先聞之遣質子歸得立

為王漢遣使詔新王令入朝天子將加厚賞樓蘭王後妻故繼母也謂王曰先王遣兩子質漢皆不還柰何欲往朝乎王用其計謝使曰新立國未定願待後年入見天子然樓蘭國近在東垂近漢當白龍堆乏水草常主發導負水僮糧送迎漢使又數為吏卒所寇懲艾不便與漢通後復為匈奴反間數遮殺漢使其弟尉屠耆降漢具言狀元鳳四年大將軍霍光白遣平樂監傅介子往刺其王介子輕將勇敢士齎金幣揚言以賜外國為

名既至樓蘭詐其王欲賜之王喜與介子飲醉將其王
屏語壯士二人從後刺殺之貴人左右皆散走介子告
諭以王負漢罪天子遣我誅王當立王弟尉屠耆在漢
者漢兵方至毋敢動自令滅國介子遂斬王嘗歸首馳
傳詣闕縣首北闕下封介子為義陽侯乃立尉屠耆為
王更名其國為鄯善為刻印章賜以宮女為夫人備車
騎輜重丞相將軍百官送至橫門外祖而遣之王自請
天子曰身在漢久今歸單弱而前王有子在恐為所殺

國中有伊循城其地肥美願漢遣一將屯田積穀令臣
得依其威重於是漢遣司馬一人吏士四十人田伊循
以鎮撫之其後更置都尉伊循官置始此矣

自武帝始通罽賓自以絕遠漢兵不能至其王烏頭勞
數剽殺漢使烏頭勞死子代立遣使奉獻漢使闕都尉
文忠送其使王復欲害忠忠覺之迺與容屈王子陰末
赴共合謀攻罽賓殺其王立陰末赴為罽賓王授印綬
後軍侯趙德使罽賓殺與陰末赴相失陰末赴鎖琅當

德殺副已下七十餘人遣使者上書謝孝元帝以絕域
不錄於其使者於縣度絕而不通成帝時復遣使獻謝
罪漢欲遣使者報送其使杜欽說大將軍王鳳曰前蜀
賓王陰末赴本漢所立後卒畔逆夫德莫大於有國子
民罪莫大於執殺使者所以不報恩不懼誅者自知絕
遠兵不至也有求則卑辭無欲則驕謾終不可懷服其
鄉慕不足以安西域雖不附不能危城郭前親逆節惡
暴西域故絕而不通今悔過來而無親屬貴人奉獻者

皆行賈賤人欲通貨市買以獻為名故煩使者送至縣
度恐失實見欺凡遣使送客者欲為防護寇害也起皮
山南更不屬漢之國四五斤侯士百餘人五分夜擊刀
斗自守尚時為所侵盜驢畜負糧須諸國稟食得以自
贍國貧小不能食或桀黠不肯給擁彊漢之節餒山谷
之間乞匄無所得離一二旬則人畜棄捐曠野而不反
又歷大頭痛小頭痛之山赤土身熱之阪令人身熱無
色頭痛嘔吐驢畜盡然又有三池盤石阪道陁者尺六

七寸長者徑三十里臨崢嶸不測之深行者騎步相持
繩索相引二千餘里乃到縣度蓄隊未半阮谷盡靡碎
人墮執不得相收視險阻危害不可勝言聖王分九州
制五服務盛內不求外今遣使者承至尊之命送蠻夷
之賈勞吏士之衆涉危難之路罷弊所恃以事無用非
久長計也使者業已受節可至皮山而還於是鳳白從
欽言屬賓實利賞賜賈市其使數年而壹至云

武帝始遣使至安息王令將將二萬騎迎於東界東界

去王都數千里行比至過數十城人民相屬因發使隨漢使者來觀漢地以大烏卵及犂軒眩人獻於漢天子
大說

宣帝時匈奴乖亂五單于並爭漢擁立呼韓邪單于而
郅支單于怨望殺漢使者西阻康居其後都護甘延壽
副校尉陳湯發戊己校尉西域諸國兵至康居誅滅郅
支單于是時元帝建昭三年也至成帝時康居遣子侍
漢貢獻然自以絕遠獨驕嫚不肯與諸國相望都護郭

舜數上言本匈奴盛時非以兼有烏孫康居故也及其稱臣妾非以失二國也漢雖皆受其質子然三國內相輸遺交通如故亦相候伺見便則發合不能相親信離不能相臣役以今言之結配烏孫竟未有益反為中國生事然烏孫既結在前今與匈奴俱稱臣義不可距而康居驕黠訖不肯拜使者都護吏至其國坐之烏孫諸使下王及貴人先飲食已乃飲啗都護吏故為無所省以夸旁國以此度之何故遣子入侍其欲賈市為好辭

之詐也匈奴百蠻大國今事漢甚備聞康居不拜且使單于有自下之意宜歸其侍子絕勿復使以章漢家不通無禮之國敦煌酒泉小郡及南道八國給使者往來人馬驢橐駝食皆苦之空罷耗所過送迎驕黠絕遠之國非至計也漢為其新通重致遠人終羈縻而未絕大宛國多善馬馬汗血言其先天馬子也張騫始為武帝言之上遣使者持千金及金馬以請宛善馬宛王以漢絕遠大兵不能至愛其寶馬不肯與漢使妄言宛遂

攻殺漢使取其財物於是天子遣貳師將軍李廣利將兵前後十餘萬人伐宛連四年宛人斬其王毋寡首獻馬三千匹漢軍乃還

宣帝時烏孫公主小子萬年莎車王愛之莎車王無子死時萬年在漢莎車國人計欲自託於漢又欲得烏孫心即上書請萬年為莎車王漢許之遣使者奚充國送萬年萬年初立暴惡國人不說莎車王弟呼屠徵殺萬年并殺漢使者自立為王約諸國背漢會衛侯馮奉世

使送大宛客即以便宜發諸國兵擊殺之更立它昆弟
子為莎車王還拜奉世為光祿大夫是歲元康元年也
始張騫言烏孫雖彊大可厚賂招令東居故地妻以公
主與為昆弟以制匈奴武帝令騫齎金幣往騫既致賜
諭指昆莫發使送騫因獻馬數十匹報謝匈奴聞其與
漢通怒欲擊之烏孫恐使使獻馬願得尚漢公主為昆
弟漢遣江都王建女細君為公主以妻焉昆莫以為右
夫人匈奴亦遣女妻昆莫昆莫以為左夫人昆莫年老

欲使其孫岑陬尚公主公主不聽上書言狀天子報曰
從其國俗岑陬遂妻公主昆莫死岑陬代立江都公主
死漢復以楚王戊之孫解憂為公主妻岑陬陬以國
與季父大祿子翁歸靡復尚楚主解憂昭帝時公主上
書言匈奴發騎田車師車師與匈奴為一共侵烏孫惟
天子幸救之漢議欲擊匈奴會昭帝崩宣帝即位公主
及昆彌皆遣使上書言匈奴復發大兵侵擊烏孫惟天
子出兵以救公主昆彌漢兵大發十五萬騎五將軍分

道並出獲單于父行及嫂居次名王犂汗都尉千長騎將以下四萬級元康二年烏孫昆彌上書願以漢外孫元貴靡為嗣令得復尚漢公主上乃以烏孫主解憂弟子相夫為公主而遣之未出塞聞烏孫昆彌翁歸靡死烏孫貴人共立岑陁子泥靡代為昆彌號狂王天子召還少主狂王復尚楚主解憂後翁歸靡襲殺狂王自立為昆彌宣帝立元貴靡為大昆彌烏就屠為小昆彌自分立兩昆彌後漢用憂勞且無寧歲

自武帝初通西域置校尉屯田渠犂是時軍旅連出師
行三十二年海內虛耗征和中貳師將軍李廣利以軍
降匈奴上既悔遠征伐而搜粟都尉桑弘羊與丞相御
史奏言故輪臺以東捷枝渠犂皆故國地廣饒水草有
溉田五千頃以上處溫和田美可益通溝渠種五穀與
中國同時熟其旁國少錐刀貴黃金采繒可以易穀食
宜給足不可乏臣愚以為可遣屯田卒詣故輪臺以東
置校尉三人分護各舉圖地形通利溝渠務使以時益

種五穀張掖酒泉遣騎假司馬為斥侯屬校尉事有便
宜因騎置以聞田一歲有積穀募民有壯健有累重敢
徙者詣田所就蓄積為本業益墾溉田積築列亭連城
而西以威西國輔烏孫為便臣謹遣徵事臣昌分部行
邊嚴勅太守都尉明烽火選士馬謹斥侯蓄芟草願陛
下遣使使西國以安其意臣昧死請上迺下詔深陳既
往之悔曰前有司奏欲益民賦三十助邊用是重困老
弱孤獨也而今又請遣卒田輪臺輪臺西於車師千餘

里迺者以縛馬書徧視丞相御史二千石諸大夫郎為
文學者迺至郡屬國都尉成忠趙破奴等皆以虜自縛
其馬不祥甚哉或以為欲以見彊夫不足者視人有餘
易之卦得大過爻在九五匈奴困敗公車方士太史治
星望氣及大卦龜著皆以為吉匈奴必破時不可再得
也又曰北伐行將於馮山必克卦諸將貳師最吉故朕
親發貳師下馮山詔之必無深入今計謀卦兆皆反繆
重合侯得虜侯者言聞漢軍當來匈奴使巫埋羊牛所

出諸道及水上以詛軍單于遺天子馬裘常使巫祝之
縛馬者詛軍事也又卜漢軍一將不吉匈奴常言漢極
大不能饑渴失一狼走千羊迺者貳師敗軍士死畧離
散悲痛常在朕心今請遠田輪臺欲起亭隧是擾勞天
下非所以優民也今朕不忍聞大鴻臚等又議欲募囚
徒送匈奴使者明封侯之賞以報忿五伯所弗能為也
且匈奴得漢降者常提掖搜索問以所聞今邊塞未正
闌出不禁障侯長吏使卒獵獸以皮肉為利卒苦而烽

火乏失亦上集不得後降者來若捕生口虜迺知之當
今務在禁苛暴止擅賦力本農修馬復令以補缺毋乏
武備而已郡國二千石各上進蓄馬方畧補邊狀與計
對由是不復出軍而封丞相車千秋為富民侯以明休
息思富養民也初貳師將軍李廣利擊大宛還過杆彌
杆彌遣太子賴丹為質於龜茲廣利責龜茲曰外國皆
臣屬於漢龜茲何以得受杆彌質即將賴丹入至京師
昭帝乃用桑弘羊前議以杆彌太子賴丹為校尉將軍

田輪臺輪臺與渠犂地皆相連也龜茲貴人姑翼謂其王曰賴丹本臣屬吾國今佩漢印綬來迫吾國而田必為害王即殺賴丹而上書謝漢漢未能征宣帝時長羅侯常惠使烏孫還便宜發諸國兵合五萬人攻龜茲責以前殺校尉賴丹龜茲王謝曰迺我先王時為貴人姑翼所誤我無罪執姑翼詣惠惠斬之時烏孫公主遣女來至京師學鼓琴漢遣侍郎樂奉送主女過龜茲龜茲前遣人至烏孫求公主女未還會女過龜茲龜茲王留

不遣復使使報公主主許之後公主上書願令女比宗
室入朝而龜茲王絳賓亦愛其夫人上書言得尚漢外
孫為昆弟願與公主女俱入朝元康元年遂來朝賀王
及夫人皆賜印綬夫人號稱公主賜以車騎旗鼓歌吹
數十人綺繡雜繒琦珍凡數千萬留且一年厚贈送之
後數來朝賀樂漢衣服制度歸其國治宮室作徼道周
衛出入傳呼撞鐘鼓如漢家儀外國胡人皆曰驢非驢
馬非馬若龜茲王所謂羸也絳賓死其子承德自謂漢

外孫成哀帝時往來尤數漢遇之亦甚親密

武帝天漢二年以匈奴降者介和王為開陵侯將樓蘭國兵始擊車師匈奴遣右賢王將數萬騎救之漢兵不利引去征和四年遣重合侯馬通將四萬騎擊匈奴道過車師北復遣開陵侯將樓蘭尉犁危須凡六國兵別擊車師勿令得遮重合侯諸國兵共圍車師車師王降服臣屬漢昭帝時匈奴復使四千騎田車師宣帝即位遣五將將兵擊匈奴車師田者驚去車師復通於漢匈奴

奴怒召其太子軍宿欲以為質車宿焉耆外孫不欲質
匈奴亡走焉耆車師王更立子烏貴為太子及烏貴立
為王與匈奴結婚姻教匈奴遮漢道通烏孫者地節二
年漢遣侍郎鄭吉校尉司馬憙將免刑罪人田渠犂積
穀欲以攻車師至秋收穀吉憙發城郭諸國兵萬餘人
自與所將田士千五百人共擊車師攻交河城破之王
尚在其北石城中未得會軍食盡吉等且罷兵歸渠犂
田收秋畢復發兵攻車師王於石城王聞漢兵且至北

走匈奴求救匈奴未為發兵王來還與貴人蘇猶議欲降漢恐不見信蘇猶教王擊匈奴邊國小蒲類斬首畧其人民以降吉車師旁小金附國隨漢軍後盜車師車師王復自請擊破金附匈奴聞車師降漢發兵攻車師吉憲引兵北逢之匈奴不敢前吉憲即留一侯與卒二十人留守王吉等引兵歸渠犂車師王恐匈奴兵復至而見殺也迺輕騎奔烏孫吉即迎其妻子置渠犂東奏事至酒泉有詔還田渠犂及車師益積穀以安西國侵

匈奴吉還傳送車師王妻子詣長安賞賜甚厚每朝會
四夷常尊顯以示之於是吉始使吏卒三百人別田車
師得降者言單于大臣皆曰車師地肥美近匈奴使漢
得之多田積穀必害人國不可不爭也果遣騎來擊田
者吉迺與校尉盡將渠犂田士千五百人往田匈奴復
益遣騎來漢田卒少不能當保車師城中匈奴將即其
城下謂吉曰單于必爭此地不可田也圍城數日迺解
後常數千騎往來守車師吉上書言車師去渠犂千餘

里間以河山北近匈奴漢兵在渠犂者勢不能相救願
益田卒公卿議以為道遠煩費可且罷車師田者詔遣
長羅侯將張掖酒泉騎出車師北千餘里揚威武車師
旁胡騎引去吉迺得出歸渠犂凡三校尉屯田車師王
之走烏孫也烏孫留不遣遣使上書願留車師王備國
有急可從西道以擊匈奴漢許之於是漢名故車師太
子軍宿在焉耆者立以為王盡徙車師國民令居渠犂
遂以車師故地與匈奴車師王得近漢田官與匈奴絕

亦安樂親漢後漢使侍郎殷廣德責烏孫求車師王烏
孫遣將詣闕賜第與其妻子居是歲元康四年也其後
置戍已校尉屯田居車師故地元始中車師後王國有
新道出五船北通玉門關往來差近戍已校尉徐普欲
開以省道里半避白龍堆之阨車師後王姑句以道當
為拄置心不便也地又頗與匈奴南將軍地接普欲分
明其界然後奏之召姑句使證之不肯擊之姑句數以
牛羊賕吏求出不得姑句家矛盾生火其妻服紫陬謂

姑句曰矛端生火此兵氣也利以用兵前車師前王為都護司馬所殺今久繫必死不如降匈奴即馳突出高昌壁入匈奴又去胡來王唐兜國比大種赤水羌數相寇不勝告急都護都護但欽不以時救助唐兜困急怨欽東守玉門關玉門關不內即將妻子人民千餘人亡降匈奴匈奴愛之而遣使上書言狀是時新都侯王莽秉政遣中郎將王昌等使匈奴告單于西域內屬不當得受單于謝罪執二王以付使者莽使中郎王萌待西

域惡都奴界上逢受單于遣使送因請其罪使者以聞
莽不聽詔下會西域諸國王陳軍斬姑句唐兜以示之
至莽篡位莽死宗遂沒西域因絕最凡國五十自譯長
城長君監使大祿百長千長都尉且渠當戶將相至侯
王皆佩漢印綬凡三百七十六人而康居大月氏安息
屬實烏弋之屬皆以絕遠不在數中其來貢獻則相與
報不督錄總領也

西漢會要卷七十